

李文忠公全書

奏稿



李文忠公奏稿

卷之七十六目錄

海防請獎摺

光緒十九年正月十九日

覆陳鎮遠等船報銷摺

光緒十九年正月十九日

鹿丕宗祠請列祀典片

光緒十九年正月十九日

請撥南漕濟賑摺

光緒十九年二月初二日

籌辦晉賑片

光緒十九年二月初二日

勸辦察哈爾牛捐片

光緒十九年二月初二日

隄頭建滾水壩摺

光緒十九年二月初二日

派員開辦永定河石隄摺

光緒十九年二月十九日

覆陳漠河金廠獎案片

光緒十九年二月十九日

朝鮮咨請附祀各員片

光緒十九年二月十九日

奏稿七十六目錄

紳士集捐晉賑摺

光緒十九年二月二十九日

續撥晉賑協籌運費片

光緒十九年二月二十九日

請撥兩湖漕折濟晉摺

光緒十九年三月十五日

派員會賑晉邊摺

光緒十九年三月十五日

酌加永定河營餉乾摺

光緒十九年四月十五日

奏留袁世凱片

光緒十九年四月十五日

查覆苟各莊涵洞摺

光緒十九年四月十五日

沙爾富請給寶星片

光緒十九年四月十五日

徐道奎建專祠片

光緒十九年四月十五日

缺額旗地展期清釐摺

光緒十九年四月二十二日

請裁和龍峪商局摺

光緒十九年四月二十二日

請緩鹽課奏銷摺

光緒十九年五月初三日



抽練馬隊防衛熱河摺

光緒十九年五月初七日

金福曾請付史館摺

光緒十九年五月初七日

海軍經費報銷摺

光緒十九年五月二十八日

鐵艦快船俸餉片

光緒十九年五月二十八日

刪改漠河獎案片

光緒十九年五月二十八日

李文忠公奏稿卷七十六

全集一之七十六

桐城吳汝綸編錄

海防請獎摺

光緒十九年正月十九日

奏爲海防各營五年期滿遵照海軍衙門奏定章程請將在事出力文武員弁擇尤酌獎繕單恭摺仰祈

聖鑒事竊光緒十二年七月二十二日准海軍衙門咨酌議保獎章程聲明部章窒礙情形量爲變通以維時局一摺奉

懿旨依議欽此欽遵咨行到臣查原奏內開沿海省分應保營局各員尋常保獎以五年爲限所保不得優於常格其非沿海省分操防機器皆爲固圉要務並准比照海軍保獎年限章程擇優酌保以免向隅等語應以光緒十二年七月十四日奏准之日起扣至十七年七月十四日五年限滿前經通飭各營局查明出力人

奏稿七十六

員照章酌請獎敘茲據各該統領等先後開送前來臣查直隸海防兵勇駐紮天津大沽北塘蘆臺山海關及奉天之旅順大連灣山東之威海衛膠州口沿海一帶並分防保定正定大名等處地方馬步淮練水陸各軍歷年練習西洋後膛鎗礮水雷魚雷各種利器講求設伏攻守陣法逐日操演無少休息各處海口創建新式礮臺工程艱鉅胼胝經營擇要扼屯布置嚴密內衛

京畿門戶外控藩屬鄰邦其駐防內地各軍操練之暇緝捕盜賊挑河築隄保衛民生地方賴以安謐自臣莅直隸後籌辦海防二十餘年從未請獎經海軍衙門奏准開除不准列保之禁酌定五年限期始得仰邀甄錄而未經定章以前在事各員工作操防歲無虛日固已積勞甚久自應論功行賞以期鼓舞人材至製造軍械籌運糧餉各局所人員辦事得力始終勤奮按照海軍章程准

其一律給獎臣將單開各員核實刪減謹擇其尤爲出力者遵照
奏定章程分別酌獎未敢優於常格其各營駐紮處所何員現隸
何營均於列保單內明晰註明並將應獎各員銜名先期咨部立
案以符定章理合彙繕清單恭呈

御覽仰懇

天恩俯念各將士勤苦多年久著勞勩所擬獎敘均係按照尋常
勞績並未從優請

旨照准以示鼓勵出自逾格

慈施除應給千把等項仍照章咨部註冊並飭取各員詳細履歷
分送查核外所有海防五年期滿遵保營局各員緣由理合恭摺
具陳伏乞

皇上聖鑒訓示謹

奏稿七十六

奏

覆陳鎮遠等船報銷摺

光緒十九年正月十九日

奏爲北洋海軍鎮遠等船歷屆銷案疊經部查據案核覆請銷恭摺仰祈

聖鑒事竊北洋海軍鎮遠致遠等三艦四快船光緒十二三四五等年用款前經分案造具清冊奏咨請銷疊經兵部行查各款當卽飭據天津海防支應局司道詳稱原送冊造致遠等船洋員薪飯川資各款前奉部查業經詳晰登覆茲兵部復以續送合同內正管輪白羅們他耳等六名僅稱於十五年以前陸續遣撤病故究竟該洋員等月支薪飯銀若干遣撤時各給艙位川資若干係於何年月遣撤合同內均未開列至所稱該洋員等川資銀兩係援照接帶致遠等船來華准銷成案係於何年月日經本部准銷應一併聲覆等因查白羅們他耳等月支薪飯細數遣撤時應給

奏稿七十六

三

頭等船費各節光緒十四年二月開業於配設致遠等船員名薪餉並酌留洋員案內分晰開單奏咨立案該洋員等續留與否尙待期滿酌辦當初立合同之際其遣撤日期自屬無從預報迨十六年開續送合同所開均係現在當差及續雇之員白羅們他耳等早經遣撤病故應於銷冊內分別造報續送合同自未便列入當已隨冊聲明並非遺漏至該洋員等回國川資係援照光緒十六年二月間海軍衙門會同戶兵工部核覆致遠等船來華用款准銷成案辦理又致靖經來四快船需用軍火等件共九百噸在滬起卸雇用駁船共支運費銀一百八兩有奇前經部查當以前項軍火各件繁重零星起駁入棧展轉多次均由商棧包運祇能按噸估計不能以斤重號件程途里數強爲分算登覆茲兵部咨令仍造冊送部查前項軍火各件共九百噸合重一百五十餘

萬斤由輪船駁入招商局棧房計程十餘里上海駁船極小雇價極昂每船至多不過裝七八十擔若照天津軍械局及南洋搬運軍火車船腳力准銷成案每小駁船一隻給雇價銀八錢此一百五十餘萬斤即須船二百隻合銀一百六十兩另須雇夫上下搬運等費尚不在內今由商棧包運僅用銀一百八兩有奇實係格外節省且天津軍械局搬運軍火支款向不分斤重里數歷經造報准銷有案應請照案准銷又大沽口運煤駁費及存棧貨物保險兩款前經部查業已詳晰登覆茲兵部復又行查刪減查上年登覆兵部駁查三十四兩年非洋防費銷案內大沽船鴨運交各兵輪煤炭在大沽口沙外運交者原定每噸銀一兩六分嗣減爲八錢六分沙內運交者每噸銀七錢一分在大沽口內運交者每噸銀五錢均係雇用民船運送按照民價從減議定委難絲毫

奏稿七十六

四

再減存棧保險一款非洋由外洋購辦貨物到滬存棧隨時與行家議明如在一月以外兩月以內者仍援照輪船保險章程每價銀千兩給銀三兩若存棧未及一月按照每七日洋人一禮拜每價銀千兩給銀七錢五分核算有省無費由臣奏請照數准銷於十八年十二月二十四日奉到

硃批著照所請該部知道欽此欽遵在案此次鎮遠致遠等船支過運煤駁費及存棧貨物保險兩款與前案事同一律應請照數准銷等情具覆前來臣查非洋創辦海軍鎮遠致遠等七船仰賴醇賢親王主持擘畫始底於成一切俸餉章程悉出

醇賢親王手定舉凡用款鉅細無不立有範圍奏奉

懿旨允准頒行恪遵辦理該七船每年應需餉項均領自海軍衙門由天津支應局代收代放遇有活支各款隨時彙咨海軍衙門

立案計該七船光緒十二三四五等年用款共應歸兵部核銷銀一百十八萬五千五百一兩有奇內經部查各款僅銀九千一百餘兩而此九千一百餘兩中運煤駁費存棧保險兩款業已於北洋防費案內奏明准銷洋員川資駁運軍火兩款亦皆有准銷成案可稽其餘請銷七船俸餉雜費洋員薪飯等項共銀一百七萬六千四百餘兩均係遵照海軍章程照額應支之款徒以牽於細故往復行查動煩文牘致歷屆全案久懸未結查戶部核覆光緒元年至六年洋員支款案內聲稱本部核銷各項總以例章奏案爲憑北洋所覆各節亦係實在情形應由該大臣自行奏明辦理等因歷將光緒十四年以前北洋海防銷案經部駁查各款逐一登覆奏請准銷奉

旨著照所請該部知道欽此該七船光緒十五年分采買軍火等

奏稿七十六

五

項經費亦於十八年十二月間經工部核奏照數准銷且查定遠等三艦光緒十一年冬季薪糧公費銀四萬四千二百三十五兩有奇奏明歸入北洋防費案內動支造報亦經兵部核奏照數准銷所有該七船光緒十二三四五等年在海軍衙門領款內支過俸餉雜費洋員薪飯川資駁費保險等款應歸兵部核銷銀一百十八萬五千五百一兩一分四釐四毫六絲三忽九微七纖本係照案接支核與從前准銷各案事同一律委係實用實報並無絲毫浮糜合無仰懇

天恩敕下兵部一併照數准銷以清案款除將原冊咨部外謹恭摺具陳伏乞

皇上聖鑒訓示謹

奏

鹿丕宗祠請列祀典片

光緒十九年正月十九日

再定興縣人道銜卸任貴州都勻府知府鹿丕宗於咸豐六年八月初二日因苗匪攻陷府城自焚殉難經貴州撫臣並據同鄉京官呈由都察院疊次奏奉

諭旨優卹予諡入祀昭忠祠准於本籍并服官省分各任所建立專祠由地方官春秋致祭等因欽遵在案臣查鹿丕宗服官黔省二十餘年循聲卓著在都勻任內適當苗匪倡亂率團捍禦屢挫凶鋒困守孤城一年之久城陷已在交卸以後猶守城亡與亡之義慷慨捐軀闔門同殉情形慘烈凜然大節允足矜式鄉里永享馨香原籍定興縣專祠落成已久應請

旨列入祀典由地方官春秋致祭所需祭品銀兩在於司庫建曠項下動撥以符例案而慰忠魂理合附片具陳伏乞

奏稿七十六

六

聖鑒訓示謹
奏

請撥南漕濟賑摺 光緒十九年二月初二日

奏爲直屬窪區被災較重民情困苦援案籲懇

賞撥南漕以濟春賑恭摺仰祈

聖鑒事竊查直屬上年霪雨爲災各河漫決災重州縣共三十餘處廬舍民田盡成澤國張家口外各處嚴霜早降幾至顆粒無收災深民困仰蒙

恩旨截留漕米開辦賑捐並欽奉

懿旨賞撥內帑銀二萬兩與順屬分半撥賑已將辦理急撫冬賑情形隨時奏報並於去臘預籌春賑摺內聲明屆時酌請截漕以救民命在案茲查各屬高地雖經涸復但麥收須至四五月閒張家口一帶播種較晚秋後始有生機青黃不接爲日甚長其安州青縣靜海等處地勢最窪積水未消更無麥收可望災民遍野覓

奏稿七十六

七

食維艱若不接續撫綏必致委填溝壑據災重之安州等三十餘州縣廳紛紛請領銀米查戶給賑並應擇要挑濬河身修培隄埝疏消積水俾窮黎得以備趁餬口現已派員分投認真查辦惟災區過廣戶口極多工程亦復繁鉅統計工賑兩項在在需款直隸本係瘠苦缺額之區豐年度支尙形竭蹶况值連年災祲糧租蠲緩庫儲羅掘殆盡僅恃賑捐一項藉資挹注無如東賑未停蘇晉等省亦同時開辦勢分力薄收數寥寥籌款之難甚於往屆當此民窮食盡有不可終日之勢查光緒三十四十七等年疊因水災奏請截留江浙春漕十萬石以資工賑均蒙

特旨允准本年海運新漕轉瞬輓轡北上而直屬上年災況與十六年相同窮黎嗷嗷待哺望

澤尤殷不得不作發棠之請除順天所屬已蒙

恩賞京倉米四萬石外合無籲懇

天恩賞撥江蘇海運漕米五萬石卽以招商輪船運津之米就近截留責成天津道會同籌賑局司道驗兌作爲保定河間天津遵化等屬工賑之需其不敷之款由臣督飭司局設法湊濟仍詳察各州縣災區輕重情形及時勻撥嚴飭印委確查應賑戶口核實散放並以工代撫務使實惠及民不准絲毫弊混至隨漕之輕齎茶果箇兒錢等項及由津至通剝價運費經剝耗食米石請旨照歷屆成案飭由糧道核數提扣解交賑局津貼運費查本屆江蘇浙江起運新漕一百一十萬餘石今請截留五萬石爲數無幾於京倉似尙無損而於畿境垂斃災黎保全實多如蒙俯允所請仰祈

特旨宣示則

奏稿七十六

八

恩出自上益足固民志而廣

皇仁理合恭摺具奏是否有當伏乞
皇上聖鑒訓示施行謹

奏

籌辦晉賑片

光緒十九年二月初二日

再承准軍機大臣字寄正月二十九日奉

上諭據內閣學士惲彥彬御史王倣奏山西災情甚重請飭籌撫運糧協賑覈捐各摺片上年山西邊外七廳及大同等府被災較廣業由該省籌款賑撫現在青黃不接爲日正長小民困苦情形實堪軫念本日明降諭旨由戶部撥銀十萬兩交張煦覈實散放至采運糧石全在商販流通所有直隸山西兩省應收粗糧釐稅著李鴻章張煦通飭各屬一律停收遇有糧運過境飭卽妥爲護送以廣招徠李鴻章於萬全等縣被災地方已派員賑撫該處與山西境地毗連並著該督籌撥賑款飭令派出之員就近在山西邊境協賑等因欽此仰見

聖明軫念飢黎無微不至但有告災之疏無不立沛

奏稿七十六

九

恩施茲因晉省災荒

特頒部帑並

救廣籌賑撫卹蘇民困伏讀之下欽感莫名竊念山西爲

京師右輔與直隸緊鄰但使力能兼籌何敢意存漠視臣去冬一

聞災信卽飭籌賑局司道電商南中義紳勸集捐款五萬兩並由

運司季邦楨借撥三萬兩海關道盛宣懷籌捐二萬兩派委山東

候補知州潘民表等解往直晉毗連災重之區查戶散放又以附

近災區糧價極昂飭令在津采辦大米一萬石續派候補知州馮

慶鏞設法運赴山西豐鎮一帶以濟民食並出示招商運米停收

釐稅嚴禁遏糴擡價俾得轉運流通上年直境宣化口北等處同

時被災尤以張家口廳萬全縣爲最重已飭就地籌捐分設粥廠

借動倉穀並由局先後添撥賑銀遴派安員會同該廳縣查放各

賑現已接辦春撫需用尙鉅仍飭局勉爲籌濟由口北道督飭妥辦直境疊遭水患籌辦工撫實已自顧不遑所恃惟在賑捐憶光緒三四年閒直晉同被大祲當時由直協晉之款多至一百餘萬皆取資於南省紳富遠及於海外之華商自是以來各省偏災幾於無歲不捐久已勢成弩末商情物力迥異從前此次開辦賑捐收數竟屬寥寥較之十六年彌爲不及現在惟有多方勸募設法招徠但得捐數稍旺卽當隨時儘力協助不敢稍分畛域以冀仰慰

宸廑理合附片覆陳伏乞

聖鑒謹

奏

勸辦察哈爾牛捐片 光緒十九年二月初二日

再張家口內外因上年秋閒嚴霜早降禾苗枯萎顆粒無收被災村莊至二百餘處之多民間困苦流離不堪言狀現雖分別賑撫而耕田牛馬宰賣殆盡若不設法籌備必致耕作難興茲據口北道吉順以察哈爾所屬滿蒙官民牧養蕃盛尙可捐助牛隻會商察哈爾都統及旗羣各官均慨然樂從現已派員勸辦分撥應用請奏明立案事竣照章核獎等情前來臣查光緒四年直隸河閒等府旱災察哈爾各旗羣捐助耕牛經臣奏請援照蒙古節次報捐駝馬成案核給獎敘仰蒙

恩准有案今張家口內外一帶災象較重必須籌撥牲畜以資力田之用察哈爾都統惠銘軫念災區顧全大局各旗羣官民好義急公輸將踴躍於救荒要政裨益匪淺近來旗羣苦累生計頗窘

奏稿七十六

十一

此次捐助牛隻非內地勸捐可比亦與尋常捐案不同前此請獎成案每牛一隻核合實銀十四兩本屆應仍照辦隨時填給實收事竣援案另行彙開清單奏懇

恩施從優給獎以示鼓勵謹附片具陳伏乞

聖鑒敕下戶部理藩院衙門查照謹

奏

奏爲天津隄頭地方建立滾水大壩開挖減河分洩各河盛漲以紓積患而維全局恭摺仰祈

聖鑒事伏查直境永定大清子牙南北運五大河上受西北塞外及晉豫各省之水向皆匯於天津三岔口形勢一束委輸不暢下由海河至大沽出海海河自白塘口以上本極灣曲兼以伏秋盛漲海潮頂托水勢更盤旋而不能進下壅則上潰歷年各屬水患職此之由從來治水者先治下游治直隸之水尤以疏通尾閘多籌去路爲第一要義臣察酌情形力籌補救每以限於經費未得通體大修疊次於南北運修挑減河開壩亦係急則治標專顧一隅之計非於水道總匯之處另籌分疏出海之途不足以消澹沈災挽回積困上年冬閒飭委新授大順廣道吳廷斌乘水落後馳

奏稿七十六

十一

赴各處詳細察看籌一扼要辦法茲據該道周歷相度擬於天津城北隄頭地方運河東岸建立滾水大壩接挑減河引入塌河淀下由金鐘河北塘口出海並由塌河淀南之孫莊別開減河分入海河由大沽口出海繪具圖說稟請核辦前來臣覆加察閱並與該道逐細商推查得隄頭地方適居三岔口之上距永定河大清河下口三百丈距北運河下口一百六十丈距子牙河下口一百丈距對岸疊道木橋九十餘丈係南運河北岸漫水歸入之處是該處實爲五大河羣流總匯之區隄外迤東一帶漸趨低下開河洩水甚爲得勢現由此處修建滾水大減壩一座金門口寬二十五丈龍骨高於正河底一丈八尺開挖徑直引河一道長十七里直趨塌河淀心正對金鐘河口以光緒十六年十八年水勢極大時計之壩口過水七八尺約可分洩五大河盛漲十分之四有此

別途歸海不致併入三岔口以專歸海河實爲釜底抽薪之策但分洩既暢水勢必甚洶猛壩工尤須十分堅固乃能經久所有金門龍骨迎水出水簸箕平鋪海墘兩岸金牆雁翅各工均用上等石料修砌並以外洋禦水經久之塞們德土鈎抹兩面泊岸用三合土堅築其沿口另築護沿灰土上抹塞們德土修築堅實又於滾水壩之南修邊閘一座別開引河以通減河下口仍修小閘以時啟閉俾藉長流以刷河槽免致水涸時減河淤墊又隄頭之北舊有霍家嘴減河一道係分洩北運河盛漲歸入塌河淀疊次大水衝刷壩工損壞並應照舊修復添做平鋪石海墘各工並將引河十一里加挑寬深以資分洩惟塌河淀本受筐兒港陳家溝霍家嘴各減河之水茲再加隄頭一大減河受水過多亟須添籌出路以免沿淀村民受患查金鐘河上引淀水下達北塘入海係

奏稿七十六

主

於同治十二年派委吳廷斌勘度挑辦之工歷加修治河身六十餘里本甚條直每屆汛漲水勢奔騰下注極爲通暢茲擬再將該河首尾一律加寬挑深更足以資暢洩又於塌河淀南之孫莊開挖減河一道計長三十三里下接軍糧城減河由王莊歸入海河距大沽口僅四十里由此分道入海勢甚便捷如此則全淀水勢出入之數相乘上游經河既少壅遏之患沿淀各村亦無淹浸之虞統計全工開挖新河加挑舊河各兩道新設滾水大壩修復滾水舊壩各一座各河須添建橋梁數座工段極長需費極鉅籌辦本非易事惟念頻年水患工撫繁興上勞

宵旰之塵下覩民生之困臣久司畿甸兼管河防終歲焦思博諮眾議但有補救之策敢辭籌措之煩此工既成但能妥籌修守歷久不廢則來源雖廣去路較多卽遇水大之年必資宣洩之利上

游腹地縱有被災處所而消退能速涸復地畝尙可補種秋麥則
工撫之費所省實多於全省河道民生裨益洵非淺鮮此閒熟悉
地勢水利之紳民聞有此舉皆欣盼大工之速成當飭估定工程
遴派委員分投購備料物趁此春融開凍剋日興工現正接辦春
賑之時卽招集附近災民傭趁力作以工代撫尤爲一舉兩得所
需款項飭由籌賑局所集各省賑捐款內竭力勻撥撙節動用將
來統歸賑撫項下彙案報銷此項工程關係緊要該道吳廷斌熟
諸機宜辦事結實且係原勘議辦之員應飭親駐工次責成一手
經理以資得力俟全工告竣卽令馳赴大順廣道新任東明黃河
甫交凌汛尙非喫重之時不至貽誤所有籌辦天津隄頭等處河
壩各工緣由理合恭摺具陳伏乞

皇上聖鑒訓示謹

奏稿七十六

七

奏

派員開辦永定河石隄摺

光緒十九年二月十九日

奏為選派大員開辦永定河北上汛石隄工程恭摺仰祈

聖鑒事竊永定河北上汛一號至八號現擬接造石隄計長八里

連添修土格共估需銀五十四萬四千八百餘兩請由部分年撥

款興辦經臣於光緒十八年十月奏奉

旨敕部籌議嗣經工部會同戶部議准照辦請由直隸選派大員

督率經理務於三年內一律完工本年先指定河南省及揚州鳳

陽兩關協款銀十九萬兩餘俟籌有定款分年指撥薪賞等項需

銀三萬兩由直隸自行湊撥專案報部備核等因具奏奉

旨依議欽此鈔奏咨會前來臣查永定河北上汛接造石隄屏蔽

京師關係下游民生利害亟宜及時舉辦惟工作極艱需費頗鉅

每年除伏秋大汛及凍結期內只有五六箇月做工時日又甚促

奏稿七十六

五

迫業將一切情形於前奏詳細陳明現在興辦大工尤須得人經

理臬司周馥歷辦河隄各工最稱諳練且係原勘估定之員應即

派令督辦候補道張蓮芬上年會辦永定河合龍大工深協機宜

候補道寶延馨久任永定河廳員情形熟悉應派該兩員及永定

河道萬培因會同辦理該臬司衙門應辦公事甚多於開工後先

行回省遇有緊要事件隨時緘商仍抽暇赴工督催察看責成張

道蓮芬常川駐工與寶延馨萬培因督率印委各員趨辦茲據該

司道等稟報業於二月十五日開工查此項工程以采運料物為

大宗應於冬令農閒車賤之時預為儲備原估係照極廉之價摺

節核計春融後農事方作運腳加增先飭該司道等派員採實價

值提前分投采運現計到工片石已有二千餘方石灰已有一千

萬斤可供數月之用趁此日長晴暖就已到之料及時興作惟慮

溝橋左近匠工價昂一時尙難多雇臣已調派熟悉工作之盛軍
哨勇前往幫同趕做以免稽延至挑土人夫卽用近河被水貧民
以工代撫實爲兩便工部原奏令將工程劃分段落並將一年修
竣之工援照從前畿輔水利成案節次造冊題銷查從前興辦各
工河隄橋閘疏築並舉彙估分辦故可逐年造報今估建之石隄
八里只是一段工程首尾相連必須通盤籌畫節節向前趕做未
便豫分段落每屆年底工段有已成未成及甫經開工者料物有
已到未到及訂購未運者支用款項須按工料酌量發給前後牽
算礙難按年截報應俟三年工竣後彙齊造銷以歸簡便而昭核
實現派購料監工各員均係熟手妥實可靠臣仍飭該司道等隨
時認真督察毋稍草率浮冒致干參賠目前開工立待用款飭由
司局先行設法籌墊藉應急需俟各省關撥款解到歸還此後但

奏稿七十六

十六

須款項應手得以多儲料物剋期接做三年之內定可造成其薪
賞雜用銀兩卽由籌賑局分年籌撥事竣一併報銷所有派員開
辦永定河石隄工程緣由除分咨戶工部外理合恭摺具陳伏乞
皇上聖鑒謹
奏

覆陳漠河金廠獎案片

光緒十九年二月十九日

再黑龍江漠河金廠創辦已滿三年著有成效前經臣將在事出力文武員弁擇尤請獎嗣准吏部兵部先後咨覆以光緒十五年十月以後所出金砂數目並未報部成效無憑核計保獎人數亦令刪減再行核辦各等因知照前來臣查漠河金廠自光緒十四年十二月開辦起截至十五年十月止所出金砂數目曾經報部其自十五年十一月起截至十七年十二月止收金總數及每次售金價值現據總辦礦務道員袁大化開單補報業經分咨查照在案至所保各員臣覆加查核均係在事出力久著勤勞毫無冒濫所擬獎敘免補免選者僅三十餘員餘皆請保虛銜升階並不優於常格前議保獎章程以成效之大小酌人數之多寡本未限定獎額漠河地居極邊瘴癘寒毒易致疾疫艱苦勝內地十倍人

奏稿七十六

七

皆視為畏途若非優加獎敘詎肯不惜身命遠役遐荒該廠三年以來所出金砂至六萬三千餘兩外杜強鄰之窺伺內開邊境之利源其有益於

國計民生良非淺鮮實屬辦理得法成效昭彰且總分各局十餘處在事員司數百人已未能一概列保若令再加刪減辦事得力者恐多向隅必致聞風解體有礙全局合無仰懇

天恩俯念漠河金廠事屬創辦關繫緊要邊防迥非尋常局務可比

准敕部仍照原保給獎毋庸刪減人數出自逾格

慈施謹附片具陳伏乞

聖鑒訓示謹

奏

朝鮮咨請附祀各員片

光緒十九年二月十九日

再據朝鮮國王李熙咨稱該國於壬午甲申年間荐遭變亂兼逼外訐國勢岌危歷荷

皇上再造之恩久已沒齒銜結至將領勤勞校弁奮勇亦爲士民所深感近聞提督吳兆有總兵左世柏左克成都司李得勝守備董懷章吳良輔千總崔繼澤董爾獻王道本把總周長喜先後淪逝該提督等兩次戡亂三年駐防或親冒矢石奮不顧身或重受瘡夷裒傷力戰當時情事目擊難忘勳勞卓著於生前祀典宜舉於歿後擬請援照甲申年陣亡官軍附祀成案奏懇

恩允將吳兆有等十員附祀原任廣東水師提督吳長慶專祠請據情轉奏前來臣查朝鮮壬午之變事起倉卒日人窺伺其側方潛調兵船襲其國都已故提督吳長慶統兵渡海先抵漢城獲致

奏稿七十六

大

首謀遂定其亂甲申之冬復有陪臣洪英植謀逆之事嘯聚凶黨突入王宮戕其大臣已故記名提督吳兆有統率留防各營首先入援盡殲逆徒再定其亂該國於此二役最感

中朝保護之恩前於光緒十年經該國王奏請在漢城爲吳長慶建立專祠又於十一年奏請將十年冬開陣亡弁勇王志春等附祀吳長慶專祠疊奉

諭旨允准欽遵在案吳兆有等十員係兩次定亂最爲出力之人該國王感其防衛之勤請援案附祀實有合於祭法救災捍患之義合無籲懇

天恩俯准所請將已故記名提督吳兆有等附祀吳長慶朝鮮專祠以爲將士立功海外者勸除咨會禮部外理合附片具陳伏乞聖鑒訓示謹

奏

奏稿七十六

九

紳士集捐晉賑摺 光緒十九年二月二十九日

奏為天津紳士籌集鉅款協辦晉賑恭摺仰祈

聖鑒事據天津縣紳士三品銜戶部候補郎中李士銘三品銜刑部候補郎中李士鈺頭品頂戴前福建布政使張夢元三品銜分部行走郎中張鴻翰四品銜候選員外郎楊俊元四品銜山東候補通判朱鉞等聯名呈稱山西邊外七廳及大同府屬被災極重前經派人往查餓殍相望於途存者朝不保夕棄男鬻女絡繹不絕邊外須至四月草木始得萌芽現在草根樹皮掘食已盡困苦情狀慘不忍聞該紳等奉飭籌集賑捐前年山東被水曾經集銀六萬五千兩前往查放此次晉災更重仰體

朝廷軫念災區德意多方籌募現由紳商富戶共集銀十萬兩即日帶同司事人等攜赴晉邊災重地方核實散放儻款不敷用再

奏稿七十六

三

由紳等陸續勸募呈請具奏前來臣查此次邊外受災之重為光緒三四年以後所未有上煩

宸慮特發帑金並

飭由臣籌款協賑凡在臣庶感戴同深臣初聞災信卽飭長蘆鹽

運使李邦楨津海關道盛宣懷籌集巨款派南紳潘民表等馳往

查放旋據潘民表等詳稟災情慘苦萬狀但能多籌款項卽可多

救民命直隸庫儲支絀無可添撥南省捐款又幾成竭澤之漁顧

此飢黎曷勝焦急因念天津紳富素稱好義急公頻年遇有善舉

無不踴躍輸助十六年山東水災該紳李士銘等籌款前往協賑

義聲著聞當督同司道商令設法籌捐該紳等以隔省之災視同

在己竟能慨捐鉅款不以難辭洵屬見義勇為力顧大局當此倒

懸待濟羅掘俱窮裨益實非淺鮮已飭李士鈺帶同妥靠司事迅

速馳往山西邊境被災極重之處會同各官紳確查散放一面咨
會山西撫臣轉飭地方官妥爲照料查所捐銀十萬兩內有長蘆
鹽商認捐銀五萬兩李士銘張鴻翰各自捐銀一萬兩其餘均係
零星募集事竣應准按照順直賑捐章程核給獎敘以昭激勸此
項賑款係該紳等自捐自辦應免其造冊報銷邊外災重且廣需
款甚鉅仍飭該紳等陸續籌濟總期多集一分卽災民多受一分
之益藉以仰慰

慈廩所有津紳籌捐晉賑緣由理合恭摺具陳伏乞

皇上聖鑒訓示謹

奏

再前奉

諭旨以山西災情甚重飭令籌款派員協賑等因欽此遵經督飭籌賑局司道電商南省義紳勸募銀五萬兩戶由運司季邦楨津海關道盛宣懷籌捐銀五萬兩共集銀十萬兩派委山東候補知州潘民表等解往直晉毘連災重之區查戶散放並因附近災區糧少價昂復派候補知州馮慶鏞在天津采買大米一萬石分批設法運赴山西豐鎮等處以濟民食業將辦理情形奏明在案茲據潘民表等來稟瀝陳被災地方道殣相望小民困苦流離慘難言狀非續籌接濟不足以拯垂斃災黎又飭該司道在賑捐內設法湊撥銀三萬兩解交潘民表等妥籌賑濟廣救民命昨准協辦大學士吏部尚書臣徐桐戶部尚書臣翁同龢咨會酌撥京城義

奏稿七十六

五

倉積穀二萬石奏派修撰黃思永編修李士珍等運赴災區分投賑濟惟口外山路崎嶇道途遙遠轉運費多殊難設措又經由直協撥銀一萬兩以應急需竊念畿境頻年水患籌辦工撫實已自顧不遑惟晉北猝遭奇荒屬在鄰疆義難漠視此次續撥賑款及辦運糧米協籌京倉運費等項共又合銀七萬餘兩係將現收各省賑捐儘數撥用以後捐款僅恃銜封貢監零星湊集收數必難踴躍臣仍當隨時相機竭力籌助以上副聖主軫念飢民之至意所有續撥山西賑款協籌運費各緣由理合附片具陳伏乞

聖鑒謹

奏

請撥兩湖漕折濟晉摺 光緒十九年三月十五日

奏為遵查山西災情甚重賑款需用尙鉅懇

恩准撥湖廣漕米價銀以資接濟恭摺仰祈

聖鑒事竊承准軍機大臣字寄光緒十九年三月初四日奉

上諭前因山西被災較重賞發部庫銀十萬兩賑濟旋據張煦覆
奏冬春賑撫及籌款購糧情形該省已發銀二十五萬兩米數萬
石現在春麥可種民情安謐等語嗣復據徐桐等奏捐米二萬石
李鴻章奏天津續捐銀十餘萬兩總計賑款銀米為數已不爲少
茲復據御史林紹年奏請撥湖廣折漕銀兩解往散放一摺直隸
與山西壤地毘連見聞較確現在該處辦賑情形若何是否尙須
接濟著李鴻章迅速確查覆奏至湖廣折漕銀兩現在已否購米
運津並著查明具奏林紹年原摺著鈔給閱看將此諭令知之欽

此仰見

奏稿七十六

三

聖慈軫念災黎有加無已凡在官民同深欽感伏查晉省去年夏
秋之閒或遭水旱或被霜雹田禾枯槁收成失望災歉州縣共有
四五十處而北路邊外各廳及毘連直境之大同府屬被災尤重
臣前奉

諭旨協籌賑款其陸續勸集銀二十餘萬兩先派山東候補知州
潘民表復派刑部郎中李士鈺直隸候補知州秦奎良候選教諭
褚成煒等馳往晉邊災重地方核實散放業將辦理情形先行陳
奏在案現在各該員紳疊次來稟歷述經過之天鎮陽高等處賣
男鬻女絡繹於途而口外七廳災象更甚所到之處餓殍盈野村
落成墟慘苦情形目不忍覩詢因該處歉收已經三年民貧地瘠
夙鮮蓋藏去歲猝遇奇荒束手待斃有力之家初尙能以糠粃果

腹繼則草根樹皮均已掘食殆盡朝不保暮岌岌可危每村餓斃日數十人現在生存饑民率皆鵠面鳩形僅餘殘喘徧加訪察竟有易子析骸之慘其困苦情狀與光緒三四年大略相同該省地方官雖經查放銀米竭力補救無如災重款絀斷難分布現就七廳而論週迴二三十里應賑戶口已不下百餘萬且有聞賑續歸者直隸協籌捐款數雖不少計口授食所得有限附近災區糧價極昂祇能暫顧目前之急邊外地氣寒冷收成最晚北路向不種麥更非南路可比該處賑務必待秋成方能停止若不亟籌接濟子遺之黎仍恐委填溝壑山西局面狹隘此次災重且廣需費過鉅本省力有未逮順直賑捐搜括無遺收數又難踴躍臣近接鄰疆義難漠視正與各司道籌商乏術焦灼莫名該御史林紹年請將湖廣漕折銀兩解往散放係爲拯救民命起見似應准如所請

奏稿七十六

五

以濟急需查湖南湖北本年報解正耗漕米六萬五千餘石雖經承辦委員在江蘇一帶采購尙未起運來津關外山路崎嶇道途遙遠前項米石若令解赴災區不但輾轉剝運耗費過多且北方食南米亦不合宜應飭該承辦委員就近迅速核實變價與水腳運費箇兒錢經紀米折等項一併核扣逕解天津由臣發交潘民表等會同京外前往辦賑各員紳確查勻放總期多得一分之款即可多活一人之命儻款不敷用臣仍當殫竭愚誠隨時設法濟助仰慰

聖主痾瘵在抱之至意如蒙

俞允應請

特旨宣示則

恩出自上益足固民志而廣

皇仁所有遵查山西賑務需款尙鉅請撥湖廣漕米價銀緣由理
合恭摺由驛覆陳伏乞
皇上聖鑒訓示遵行謹
奏

奏稿七十六

三五

派員會賑晉邊摺 光緒十九年三月十五日

奏為遴派大員前往山西邊外各廳災重地方會督員紳籌辦賑撫恭摺仰祈

聖鑒事竊光緒十九年三月初九日奉

上諭前因山西被災較重賞發部庫銀十萬兩賑濟旋據張煦覆奏冬春賑撫及籌款購糧情形該省已發銀二十五萬兩米數萬石嗣復據徐桐等奏捐米二萬石李鴻章奏陸續籌捐銀二十餘萬兩總計各項銀米源源解往諒可稍資接濟惟聞該處災民眾多嗷嗷待哺為日方長殊深軫念加恩著將湖南湖北本年應解正耗漕米六萬五千餘石迅速核實變價同水腳運費等款一併核扣徑解天津交李鴻章發交辦賑各員確查災區妥速散放毋得稍有弊混用副軫念民艱有加無已至意該部知道欽此仰見

奏稿七十六

五

聖慈垂念飢黎
恩施重疊

詔書下逮薄海同欽查本年湖南漕米係派候補道陳允頤承辦湖北漕米係派上海招商局承辦湖北報解漕米三萬二千九百十七石五斗應交折價銀五萬五千三十二兩零又水腳運費等項照章開支銀一萬六千七百四十二兩零共合銀七萬一千七百七十四兩零臣已電飭招商局先行照數籌墊剋日匯解來津湖南應交米價運費亦與湖北相同現經飛咨湖南撫臣吳大澂轉飭承辦委員迅速核解惟晉邊災區待賑孔殷誠恐緩不濟急當飭籌賑局暫行酌量挪墊以濟要需仍由湘省變價歸還統計兩省漕折運費等項約共合銀十四萬餘兩災區得此接濟裨益實非淺鮮至此項米石本已采買齊全現既飭令變價輾轉運售

難免虧折將來變賣完竣核與原支之數是否相符再行奏明辦理晉省災情以邊外七廳爲最重疊經撥款派員前往豐鎮歸化等處確查散放此次渥蒙

恩賚尤應妥籌辦理查被災地方週迴二三千里應賑戶口多至百萬事極繁重必須綜理得人方免貽誤北洋委用道劉啟彤辦事精詳熟悉賑務現將前項漕折銀兩發交該員飭令迅赴晉邊各廳會督印委各員及原派各紳察酌災情分投認真查放務須實惠均霑不准稍滋弊混庶幾仰副

宸庠所有籌墊湖廣漕折銀兩並派員前往辦賑緣由除分咨查照外理合恭摺具陳伏乞

皇上聖鑒謹

奏

酌加永定河營餉乾摺 光緒十九年四月十五日

奏爲永定河營兵苦累異常請將兵餉馬乾酌加一成按八成核發以蘇兵困恭摺仰祈

聖鑒事竊據永定河道萬培因稟稱天下之至勞苦者莫如兵而河兵爲尤甚兵可百年不用河兵則終歲勤苦修防殆無虛日治兵之法在汰其老弱簡其精銳厚其糧餉重其賞罰斯養一兵得一兵之用定制步戰糧月支銀一兩七錢守糧月支銀一兩二錢雖不足以贍家口尙可養其一身自同治五年因兵餉舊欠過多新舊套搭轆轤不清改發七成實銀計守糧月支銀八錢四分每日核銀二分八釐卽養一身而不足前者本河險工尙少且有防險民夫以佐兵力之不逮凌伏秋三汛外尙可稍偷餘閒自營生計今則險夫旣停兼以連遭大水頻年失事險工日增工作日繁

奏稿七十六

天

兵力遂日困每年二月上隄備禦冰泮凌汛後堆積險工土牛鑿做埽段加簽椿木工作未竟而大汛屆臨日夜防守如大敵將至迨河水漲發奇險猝生晝夜風雨之中賴該河兵履危蹈險奮力搶護盼至秋分節屆通工倖獲安瀾兵力似可稍紓而殘隄須補積土須交水溝浪窩又須平治惟臘正兩月天寒地凍不便工作然堆儲椿料擗打纓纜亦非藉兵力不可兵之勞如彼而餉之薄如此遇有河兵額出幾至應募乏人何以整頓工防請將三成缺額餉乾規復舊額以恤兵艱等情臣查永定河營額設經制外委二名步兵一百七十九名守兵一千四百一十名官例馬二十四又同治十二年新添步戰兵十名守兵九十名新舊統共歲支餉乾銀二萬五千七百五十兩六錢嗣按七成減發歲支實銀一萬八千二十八兩九錢二分遇閏加七成銀一千五百餘兩計外委

每名月僅支馬糧銀一兩四錢步戰兵每名月僅支銀一兩一錢九分守兵每名月僅支銀八錢四分馬每匹冬春月僅支銀八錢四分夏秋月僅支銀六錢三分河兵終年勞苦所得餉需不敷餉口委係實在情形該道請將餉乾加復原額洵爲強兵衛工起見惟直隸爲缺額之區司庫入不敷出若將該河營減發餉乾全數規復每歲須加發銀七八千兩日久恐難爲繼不得不再三斟酌期於庫款兵糧兩無窒礙查守護

東西陵官兵俸餉廉乾同治年間自行奏請均按八成實銀支給上年三河駐防旗兵因差務繁重亦經臣奏准將餉需改發八成該河兵常年力役胼胝經營較之守衛

陵寢分防汛地差操勤勞無甚區別臣督同藩司悉心核議擬請自本年秋季起將該河營舊額新添各兵餉乾酌加一成統按八

奏稿七十六

无

成實銀支發計每歲加支銀二千五百七十五兩五錢六分遇閏加支銀二百餘兩爲數無多俾該河兵稍資周轉自當感激奮興盡心修守是體恤兵困卽所以慎重河防理合恭摺具陳伏乞

皇上聖鑒訓示施行謹

奏

奏留袁世凱片

光緒十九年四月十五日

再准總理各國事務衙門咨准吏部文稱光緒十九年三月十七日內閣奉

上諭浙江溫處道員缺著袁世凱補授欽此當卽恭錄轉行遵照臣查袁世凱派駐朝鮮以來內戢藩服之僭踰外杜強鄰之窺伺歷年籌辦各節臣於上年六月閒曾經詳細奏陳近年該國君臣稔其忠誠可靠於利害向背頗知審擇遇有重要事件輒與悉心籌商隨時補救裨益尤多東藩介居強大之間事會方殷必須有情形熟悉物望素孚之大員坐鎮維持未便驟易生手該道於十七年九月已屆第二次差滿臣與總理衙門往返函商以朝鮮事務關係緊要一時未得妥員仍留該道接辦現蒙簡授實缺足資鼓勵合無籲懇

奏稿七十六

三

天恩仍准留俟第三次差滿屆時察看情形再行奏明飭赴本任是否有當謹附片陳請伏乞

聖鑒訓示謹奏

查覆苟各莊涵洞摺

光緒十九年四月十五日

奏爲查明修復任邱苟各莊涵洞窒礙難行恭摺覆陳仰祈
聖鑒事竊奉光緒十九年二月十三日

寄諭有人奏訪聞直隸順天所屬之文安大城以及任雄霸保六
州縣歷被水患農田盡成澤國上年六七月間文安紳民黃元善
等呈請照舊制修築舊千里隄大苟各莊舊有水壩一道兩洞均
可洩水由大清河順流歸海直隸總督順天府尹批示嘉獎尙未
興修等語所奏是否屬實該處舊有隄壩應否興修著李鴻章孫
家鼐孫楫確切查明據實具奏等因欽此並准府尹咨請委員勘
辦前來臣查苟各莊在任邱縣地面該莊以南之綫口原有缺口
十一處本係洩水之區上游鄭州窪去夏被潞龍河漫水浸淹應
由綫口洩水歸入五官淀下游文安等縣民人偏顧一隅捏稱綫

奏稿七十六

三

口爲舊千里隄前往堵築幾釀巨衅該處涵洞廢棄已久能否修
復臬司周馥久辦河工於該處一帶形勢素熟清河道潘駿德連
年在千里隄防汛深悉情形飭令會同勘議茲據該司道參稽卷
案博訪輿論會勘籌議稟覆查苟各莊在任邱縣北緊靠千里隄
爲西淀之南岸隄內外有藏糧河故瀆俗稱古趙王河千里隄繇
互數縣建自康熙年間所以分隔清濁不使匯流隄北爲東西兩
淀及大清河隄南爲鄭州窪五官淀文安窪此隄關係任雄文大
霸保六州縣保障上下向無涵洞插壩同治十二年升任清河道
葉伯英因鄭州窪常受滹沱潞龍各河之害有時窪水高於淀水
慮鄉民偷決隄身請於苟各莊龍潭地方卽緊接古趙王河處建
小涵洞一座口寬見方二丈兩邊金牆高六尺光緒元年放水一
次二年因千里隄四鋪地方淀水南決窪水頓長復開涵洞一次

六年因淀水大漲衝潰涵洞浸坍各莊民房多閒當用土料堵築九年因溇沱河已從上游獻縣挽歸子牙故道潞龍河南隄復經修守穩固鄭窪水無來源而隄北淀底積年淤高留此涵洞必致倒灌爲害遂將涵洞加工堵塞復於涵洞之北添築大隄一道以禦淀水隄之兩頭與千里隄連接一氣原有涵洞之隄變爲隄南越隄自此涵洞遂爲廢址迄今十餘年每歲淀水發時隄南百姓惟恐防隄之不力該處涵洞不宜修復眾論僉同上年六月大水驟至潞龍河南隄駱駝灣決口水注鄭窪測量窪之東頭苟各莊地方窪水高於淀水二尺其時文安之民慮窪水下灌聚眾越境在苟各莊以南綫口地方築埝防堵綫口者卽古趙王河廢埝歷禁不准堵築者也上游任邱之民聚眾欲決而文安之民遂思變計請就涵洞向北放水入淀任民又以鄭窪之水向以綫口爲

奏稿七十六

五

出路若開涵洞消水甚微且貽後患執意不允彼此洶洶千百成羣勢將械鬪臣飭委天津府知府鄒振岳馳往彈壓酌辦時鄭窪之水約深七八尺秋禾已不及救而下游文安一帶禾稼將熟斟酌再三如果開此涵洞窪水全洩未嘗不可將千里隄刷開放水入淀爲急則治標之計無如彼時永定河南岸灰壩奪溜併入大清河與西淀相通淀水日漸增長若將千里隄挑通萬一淀水倒灌於文安非徒無益而又加害權衡酌斷惟有將綫口廢埝遲至八月初一日開放俾下游文安秋稼得以收穫上游鄭窪屆時涸復尚可布種秋麥各縣民均皆心服散去其潞龍河南隄決口已先由臣飭道嚴督印委剋期堵合使斷來源一面發銀派員爲鄭窪四十八村查辦急撫所以爲小民補救者不爲不至彼時署文安縣知縣劉煥請開苟各莊涵洞揆時度勢實多窒礙該縣紳黃

元善等旋赴府尹衙門呈請並未准行原摺所稱批示嘉獎之語
自是傳聞之誤竊思鄭窪文窪迤邐二百餘里形如釜底在大清
子牙兩河之間司河務者自以力守隄堰不使漫決方爲萬全若
水已漫入窪中下游爭堵上游爭決已屬無濟如欲決窪水入淀
轉恐引淀水入窪開門揖盜爲害益烈今春因任邱文安等處水
患飭令該司道親赴上游察勘河勢優發工撫銀兩將瀕龍河南
隄民工大加培補以爲拔本塞源之策從此隄工鞏固上下游不
致成災爭端自息雖設涵洞無所用之且近年淀底積淤高於隄
南窪地淀民常思盜決千里隄放水伏秋大汛雖派練軍礮船嚴
密協守每年扒隄之案仍不能免若建涵洞淀民一遇水漲自必
爭啟涵洞以鄰爲壑滋事更多原奏所請修復苟各莊涵洞爲洩
水之處統籌全局實屬有害無利應請無庸置議理合會同兼管

奏稿七十六

三

順天府府尹

臣孫家鼐順天府府尹

臣孫楫恭摺覆陳伏乞

皇上聖鑒再原奏所稱大苟各莊卽任邱之苟各莊所稱水壩一
道兩洞實祇一洞合併陳明謹

奏

沙爾富請給寶星片

光緒十九年四月十五日

再天津機器局創造栗色火藥延雇德國教習沙爾富數年以來
於作栗色火藥器料形色速率及漲力輕重逐細教導局中工徒
漸能領會頗著成效各海口礮臺內新式後膛大礮並鐵艦快船
之巨礮非用此藥施放不能及遠制勝該教習沙爾富悉心教授
俾海外祕法盡得其傳裨益軍需非淺合無仰懇

天恩俯准將沙爾富

賞給四品頂戴三等第三寶星以示鼓勵除俟奉

旨後由臣照式飭製給領並咨總理衙門繕給寶星執照外理合

附片具陳伏乞

聖鑒訓示謹

奏

再據開州知州賈孝彰元城縣知縣姚定元詳稱該州紳士舉人董鴻典等聯名呈稱同治七年擒逆張總愚大股由山東撲犯運河併力西竄大名適當其衝已故大名鎮總兵徐道奎統率師船分扼東昌臨清德州故城上下數百里大小數十戰於高家店桑園第二屯老君堂等處疊破悍賊不使竄入畿境大名屬賴以保全光緒五年到大名鎮任當晉豫東三省之交向爲盜賊出沒之地先後擒治著名巨盜百餘名轄境肅清東明黃河南隄爲運道民生所係該鎮以汛兵多不可恃分撥練勇一營專駐工作親督搶險近年豫境黃沁各河東境黃河疊次漫決而東明長隄屹然郡南漳河一遇盛漲輒漂沒田廬復疏濬白水灘舊河及三里河引漳水入衛河居民始登衽席在任十三年中善政不可勝舉

奏稿二十六

謹

尤爲士民所謳思現擬集賞爲該故鎮在府城捐建專祠以申報饗由布政使裕長轉據大名府知府陳啟泰詳請具奏前來臣查徐道奎於同治元年卽隨臣治軍東下勦辦粵捻轉戰南北屢當大敵疊克名城在大名鎮任內捕盜治河尤著聲績前後戰功事跡臣於十八年三月間曾經臚列

上聞蒙

恩宣付史館立傳並附祀淮軍昭忠祠在案其扼防運河一役力戰堅守邊方張之賊不得逞其非窺大名各州縣實賴以保全有關於畿防全局甚大該紳士等感其保衛之功請爲捐建專祠洵有合於祀典捍患救災之義合無籲懇

天恩俯准所請爲已故總兵徐道奎在大名府城捐建專祠由地方官春秋致祭以彰盡績謹附片陳請伏乞

奏
聖
鑒
訓
示
謹

奏稿七十六

美

缺額旗地展期清釐摺 光緒十九年四月二十二日

奏為灤州等處缺額旗租地畝限內未能查足仍請展限清釐期復原額恭摺仰祈

聖鑒事竊查直隸八項旗租地畝以灤州安肅蠡縣高陽交河固安六州縣缺額為最多年久弊深清查不易牧令懼干嚴議視為畏途光緒十四年經臣奏請變通處分寬限清釐是年七月十三日接准戶部議覆予限五年所有該六州縣經徵八項旗租如能徵起八分其餘二分暫准於奏銷案內扣除不計處分並令將各地澈底清查以次規復原額儻限滿毫無成數指名奏參如能全數清出量予獎敘等因即經轉飭認真遵辦並疊次嚴札飭催雖據各該州縣陸續查出地一百八十七項五十一畝而缺額之地為數尙多究其難以清查之故約有數端一由佃戶輾轉推當典

奏稿七十六

七

賣私相授受向不報官退佃給照甚有頂買地畝而租銀仍歸賣主完納藉以獲得重價迨數年後賣主物故或因事外出即成無著一由旗地租重歷年朦混捏報升科當時失於覺查日後即無從究詰一由內務府革退莊頭地畝該新莊頭承領退換無不揀選膏腴而領剩沙薄之地始令入官徵租佃戶因地瘠租重終年勤動不足應上供之需往往棄地逃逸為人侵佔一由各屬旗地向歸三班差役雇人承催名為催差佃戶姓名住址底帳均存各社催差之手每遇新充催差須向舊差求取底帳其中以有作無徇情捏改在所難免一由鄰封村民佃種旗地或恃隔境抗不完租或賄催差除名舞弊在官向無鱗冊可稽驟難摘發其奸一由歷屆水冲沙壓之地皆因地係隱種不敢出頭報勘而被冲佃民早經遷徙外出地租即無從催徵有此諸弊雖久於其任者尙難

一律查出該牧令均係隨後接辦之員或甫經到任更非旦夕所能見效現在限期將滿缺額尙多瀝陳爲難情形稟由藩司裕長詳請奏明展限五年設法清釐等情前來臣查此項無著地畝既經勒限清查免其經徵不力處分並經戶部奏明分別勸懲該牧令具有天良正賦所關斷無不認真查辦惟是歷年已久積弊太深所稱種種礙難情形委非虛飾租由地出地既莫得主名租銀從何催納轉瞬限期屆滿若將未經查出地畝租銀仍按經徵不力開參似非情法之平且操之過蹙復額更屬無期徒事嚴參何裨實濟查該六州縣缺額旗租地一千四百四十五項三十五畝零房七百九十七間租銀一萬七千三百四十三兩零現已陸續查出地一百八十七頃五十一畝規復租銀二千二百四十八兩是該牧令查地催科尙非畏難苟安毫無成效其餘無著地畝稟

奏稿七十六

奏

請寬展限期意在釐剔弊端查復租額非僅爲邀免處分起見應請自光緒十九年七月十三日起展限五年俾得悉心清理漸復原額庶於賦課有裨其有實在水冲沙壓不能耕種者應飭司督催勘丈明確詳請題豁額賦以昭核實理合恭摺具陳伏乞

皇上聖鑒敕部查照謹

奏

奏爲吉林擬裁和龍峪等處朝鮮通商局卡停解應領經費暫行酌留局員辦理交涉兼撫越墾韓民恭摺具陳仰祈

聖鑒事竊查吉林與朝鮮互市貿易經臣李鴻章會同前將軍希元議定通商條款勘明朝鮮會甯府對岸和龍峪設立總局慶源府對岸西步江爲琿春所屬毘連俄界設爲分局又鍾城對岸光霽峪設爲分卡於光緒十一年派員前往督理商務並由希元於邊防項下借撥銀一萬兩交該委員承領建造局房船隻定期開市俟收有稅課無論多寡先行提還借款所需經費援照朝鮮商務委員成案以是年七月起暫由山海關按結在洋稅應解出使經費項下匯撥銀三千兩就款覈實撥支發先後由臣李鴻章會同前將軍希元具奏聲明俟試辦三年後彙覈所收進出口稅

奏稿七十六

三

項能否足敷局卡用度再察酌情形會商奏辦等因嗣戶部以該局卡一年稅款收數不敷一月之用應否令該省將薪水等項覈實刪減咨由總理衙門轉咨經臣李鴻章與希元商定於十四年七月起每結刪減銀八百兩會同臣長順奏請展限三年仍由山海關按照刪減數目每結解交銀二千二百兩樽節動用嗣因限滿稅收仍未暢旺而辦理韓民越墾甫經竣事一切彈壓撫綏正關緊要復經臣等會商自十七年七月起將每結減去一千兩按照一千二百兩撥解奏請再行展限三年俟限滿如果稅項足敷支銷再請停止各在案臣等伏查和龍峪等處分設局卡本欲羈縻屬藩稽察匪類不僅爲區區稅款計然原議將來局費須待稅款開支是稅務之衰旺實關局勢之久暫計自光緒十一年十一月二十收稅之日起至十八年六月初五停徵之日止連闔計六

年零九箇月共收稅款銀五千五十餘兩每年收數不及千金而用款已撥解七萬餘兩雖經歷次遞減現在一年支款尙逾稅款數倍

國家經費有常豈容此虛設之局卡坐耗鉅帑且近來查稅巡役及護局兵勇藉稅勒索私罰者不一而足屢經局員懲辦而玩法如故凡事積久弊生矧中外言語不通尤易欺詐怨不在大其漸宜防若不亟事變通揆諸設局本意未免刺謬是以臣等於上年六月閒彼此函商將各局卡稅課暫行停徵俾免擾累一面暫留局卡撫輯墾民蓋越墾韓民自光緒十五年經臣長順奏准入籍爲民之後現在雉髮易服編甲升科遵我政教一切詞訟均由局員爲之審理稅已停徵而局未遽撤職是之故今復再三察酌此項局費曠日持久更覺虛糜擬請將西步江分局光霽峪分卡概

奏稿七十六

四

行裁撤其和龍峪總局酌留督理一員司事一名書識一名通事一名聽差二名專辦吉林朝鮮交涉事務兼撫越墾韓民如蒙俞允所有薪工以及心紅紙張等項由臣長順就地籌款援照吉林邊防各局處章程覈給咨部查照並擬將通商局名改爲撫墾二字以期名實相符所有出使項下經費卽應停解總之該處地曠民貧華韓雜處設局通商款項既無所出設局撫民體制或有未符將來能否於附近地方設官分治兼徵南稅再由臣長順體察情形另行奏請

聖主裁奪現在覈計山海關按結在出使項下撥解經費自一百結起至一百二十九結止共銀七萬一千三百六十三兩照章支發僅敷發至光緒十八年十一月止今該局卡薪工等項已發至十九年正月止尙餘銀五千八百餘兩係由歷年樽節所致先是

臣等於光緒十五年底查知該處稅收仍無起色飭令該總分局
卡刪減員役一半視事務之繁簡隨時添撤以符原奏撙節動用
之語嗣於十七年奏請展限時遂定每結減去千兩而以前減贖
銀兩尙無確數可查未及奏明今通盤句稽實餘銀五千五百餘
兩應請將此項餘銀並歷年所收稅款五千五十餘兩撥還前借
邊防項下一萬之款所餘無幾應請仍歸局費動用毋庸繳還所
有歷年用款均係撙節動支兼有盈餘應請免其造冊報銷至沿
江越墾地畝已於十七年丈竣當年升科現因局員呈送圖冊多
有舛錯經臣長順往返駁查未經繪造齊備容俟催飭更正後再
行奏明辦理除咨總理各國事務衙門及戶部查照外所有請
旨裁改通商局卡暫留局員辦理交涉兼撫墾民緣由理合恭摺
具陳伏乞

奏稿七十六

聖

皇上聖鑒訓示再此摺係由臣長順主稿因在請假期內商由臣
李鴻章繕發合併陳明謹

奏

請緩鹽課奏銷摺 光緒十九年五月初三日

奏爲援照歷屆成案請緩長蘆本年正課奏銷以恤商艱仍無誤協撥京奉各餉恭摺仰祈

聖鑒事竊據長蘆鹽運使季邦楨詳稱蘆商正課例限五月奏銷自同治十年後商情艱窘節經

奏准緩至十月啟徵茲因例限將屆催令各商完納據通綱商人晉有孚等一百二十一商稟稱直豫各岸災歉頻仍銷緝本虧商累實甚歷年蒙將正課展緩藉可專顧春秋兩運仍於秋運後趕緊完課並未誤解餉期限且能增交銀數實於課款商情兩有裨益今催令照限完納苟能遵辦曷敢玩視惟自直豫疊被災祲以後商力久未復元加以上年夏秋之閒順直水災甚重銷數頓減本年過關引鹽仍難暢旺緣蘆綱眾商殷少累多全賴春運回標

奏稿七十六

聖

以顧秋運秋運回標以顧課款此時萬難兼顧懇將本屆正課奏銷援照歷屆成案展緩該運司詳加體察確係實情若令依限完納力實未逮徒事參追無裨實際請緩至本年十月啟徵仍可無誤京奉各餉並聲明永屬鹽課奏銷屆時隨同辦理以憑核計等情具詳前來臣查長蘆正課前因商情艱窘疊次奏請展緩均蒙恩允但可依限催納豈容稍任稽延惟直豫引岸向稱疲困上兩屆引課全完商力已形竭蹶本年春運無多全恃菜秋爲命脈刻值告運喫緊鹽尙未銷課款從何籌措既經查明屬實應援照歷屆成案籲懇

天恩俯准將光緒十九年正課奏銷緩至本年十月辦理以恤商艱卽以保全課帑屆時仍當督飭運司認真催徵並將本屆奉撥京奉各餉於年內解清斷不敢稍任遲誤理合恭摺具陳伏乞

奏
皇上聖鑒訓示謹

奏稿七十六

聖

抽練馬隊防衛熱河摺 光緒十九年五月初七日

奏爲仿照直隸練軍章程抽練提標馬隊防衛熱河地方恭摺仰

祈

聖鑒事竊於上年三月間籌議熱河善後事宜以亂後伏莽未淨酌留古北口練軍各營擇要分駐巡防奏明在案該軍本係提標抽練勁旅近歲海防關係重要提督常駐蘆臺所部練軍五營先有一營出駐朝陽一營留防古北口其餘三營均調赴蘆臺駐紮緊顧大沽口北塘口後路未便久留塞外致海口要地轉覺單寒竊維熱河地方周圍二千餘里東連奉吉西接多倫北近圍場實爲

京畿屏蔽該處流民四集客匪錯居向多馬賊出沒每以數十騎聯鑣疾走到處劫掠飄忽異常兵燹之餘蒙漢積仇未解民教構

奏稿七十六

臣

衅相尋時欲乘機生事疊據留防各將領稟報隨時訪拏嚴辦迄未能淨絕根株建威銷萌全在兵力臣悉心體察非有常駐之主兵不足以資鎮攝非練得力之馬隊不足以備搜巡伏查直隸練軍馬隊章程係前督臣曾國藩及臣先後斟酌奏定餉章營制損益得宜迄今二十餘年各營遵守規條操巡認真緩急可恃上年勦辦朝陽教匪剋期掃蕩全賴練軍之力成效昭然現擬仿照辦理就地抽練馬隊專爲熱河防衛之兵全瀕地面太廣防範本屬難周僅練一營則不敷分布若練兩營則餉需過鉅難於持久惟有因地制宜酌量變通期於餉項可以節省而兵力又能兼顧查承德灤平豐甯圍場爲河屯協副將汛地平泉建昌朝陽赤峯爲八溝營參將汛地均隸於古北口提標其弁兵素習地利尙能耐苦疊與都統臣奎斌提督臣葉志超往返籌商擬於該兩營內每

營抽調精壯一百五十名各練成馬隊一旗編爲三哨卽以該副將參將爲管帶現署副將譚興魁署參將汪隆元俱久任邊缺曉暢營務可期得力官則原營兵皆土著配給精利鎗礮督令認真操練平時查拏奸宄緝捕盜賊一遇有警朝發夕至便於赴機較之添練客兵實爲事半功倍該營兵將本隸提標仍由提督督飭訓練有事則歸都統節制調遣與原有之朝陽馬隊一營及圍場之馬隊百名互爲援應足壯聲威俟成軍後卽可將新派出防之蘆臺練軍察酌情形陸續撤回如此則邊防常有精練之師而海防亦無空虛之慮洵爲永遠至計現兩旗管帶卽是本營將領以後必須慎選精悍能戰之將俾充是職月支薪水公費馬乾等銀應照練軍奏定章程各半支領字識薪水照章減一兩五錢其幫辦官哨官督隊等官薪水馬乾及什長親兵正兵等口糧馬乾均

奏稿七十六

聖

照章給發總計馬隊六哨大建月需薪公餉乾柴草等銀二千七百二兩有奇小建月需銀二千六百二十四兩有奇每歲約共需銀三萬一千九百六十餘兩除原有底餉銀五千一百六十八兩五錢二分抵支外實需添撥銀二萬六千八百餘兩直隸餉源雖極支絀事關邊防大局自應竭力代籌此項應添餉需卽飭由練餉局設法勻撥逕給該管帶官領放以歸畫一至成軍之初製辦旗幟號衣等項照章由局核給一次此後卽由管帶官自行設法修換其兵丁馬匹鞍韉價銀照章由局暫借在各兵應領餉內分月扣還統由練餉局彙案造報所有就地抽練提標馬隊防衛熱河緣由除分咨查照外理合會同熱河都統

臣奎斌直隸提督

葉志超繕摺具陳伏乞

皇上聖鑒訓示謹

奏稿七十六

吳

金福曾請付史館摺 光緒十九年五月初七日

奏爲已故道員辦理工賑勤勞卓著事蹟可傳據實臚陳籲懇
恩施仰祈

聖鑒事竊二品銜直隸候補道金福曾前在山東辦賑觸發舊疾
請假回籍就醫經浙江撫臣崧駿奏留辦理賑務湖工於光緒十
八年六月病歿差次旋據直隸在籍紳士翰林院編修呂式棟等
詳列事實呈由籌賑局司道詳請奏卹並准浙江撫臣崧駿山東
撫臣福潤咨請會奏前來臣查金福曾浙江秀水縣人同治元年
由候選訓導隨同臣軍克復蘇州常州嘉興湖州各城浔保知縣
留江蘇補用歷署婁縣南匯吳江等縣俱有政聲於婁縣興辦蠶
織南匯辦理漁課尤爲士民感頌光緒三四年閒晉豫大旱該員
募銀四十萬兩馳赴河南之河陝山西之蒲澤解絳等處徧設賑

奏稿七十六

聖

廠分置留養慈幼牛痘各局並於開歸陳所屬捐贖轉販婦孺數
千人於洛陽宜陽新安澗池境內因伊洛諸水開濬新舊各渠溉
田二十萬餘畝復於兩省衝要捐購車馬以代差徭役不累民差
無停滯最爲北省善政經前東河督臣李鶴年前河南撫臣涂宗
瀛奏獎前山西撫臣衛榮光請將所辦各善舉列入志書七年以
候選道由南中募捐北來辦賑臣以該員講求水利任事實心奏
留直隸差委時值畿南各河頻年漫溢正當隨時補救該道在直
十年於各河要工無役不預其治大清河則疏濬中亭河培築干
里隄開挖東淀積淤修復天津三河頭隄壩工竣歷經大汛河流
通暢被災之地遂獲豐收其治子牙河則修培獻縣河開大城文
安青縣靜海隄岸三百餘里復濬上游之滹沱河以清其源開下
游之王家口減河以殺其勢其治北運河則疏青龍灣減河歸入

七里海疏筐兒港減河歸入塌河淀以分津沽匯注之水又開漚水各河以洩武清寶坻窪區之水其治南運河則修恩縣四女寺減河分由海豐埕子口入海共長三百餘里以洩盛漲復於河頭作閘引水漑鹽山樂陵海豐田數千頃其兩署永定河道俱督辦堵築漫口大工十四年南二工一役奇險疊出隄身滲漏又值連旬大雨固安緊逼隄下該道往來泥淖晝夜搶築縣城始獲保全因此積受寒溼遂得手足麻木之症歷年辦理籌賑局務悉心經畫常謂辦賑當嚴於查戶而寬於放錢則款省而惠周順屬東南兩廳天津河閒兩府數十州縣連歲災賑該道親往查放所至之處覈戶填票不假吏役之手士民至今稱之其在直辦理工賑情形疊經臣及前署督臣張樹聲歷任府尹臣詳細奏明在案十二年濟南武定水災臣奏派該道募資赴東助賑修築河隄以工代

奏稿七十六

吳

撫十五年武定青州又災前山東撫臣張曜以該道辦事認真民情愛戴復奏調至東辦賑周厯肥城平陰十一州縣兩次共集資二十一萬賑災民五十二萬旋以積勞觸發舊疾請假回籍就醫是年浙西水災浙江撫臣崧駿奏派該道在籍辦賑與疾往來各屬經理工撫海甯備塘河杭州長興鎮以上塘河嘉湖各屬經流支港皆次第濬復水利大興復奏派修治餘杭南湖力疾強起工事瑣屑無不躬親至十七年秋閒工竣病遂增劇臨危時猶以直東被災函商司道馳勸紳商籌集賑捐鉅萬分解散放公忠好義之誠出於天性垂歿不衰三省官民同聲惋惜伏查近年各省辦理河務賑務積勞病故人員屢蒙

恩准優卹誠以辦工辦賑在各差中最高勤苦嚴寒酷暑經營奔走不能少休每一役竣在事出力之人率皆顛頽枯槁非堅忍強

幹者未易勝任金福曾歷辦工賑十有餘年無日不在勞身焦思之中尤非他人一時一事之勞勤可比其規畫各端成效昭著疊經各省專案奏陳四蒙

特旨嘉獎功能治行卓然可傳合無籲懇

天恩俯准將已故二品銜直隸候補道金福曾

敕部照例議卹並將事跡

宣付史館立傳以勵勤事而資觀感出自逾格

懇施除將該故員履歷事實清冊咨部外理合會同浙江撫臣崧

駿山東撫臣福潤合詞具陳伏乞

皇上聖鑒訓示謹

奏

奏爲北洋海軍經費光緒十六年收支各款分造清冊並開清單報銷仰祈

聖鑒事竊北洋海防用款前經總理各國事務衙門會同戶部奏明由督辦大臣咨報總理衙門戶部查核嗣於光緒九年八月部議行令三部分銷歷經循照辦理自十五年正月起北洋海軍各船俸餉悉遵海軍衙門奏定章程分別開辦經臣奏明遵照新章收支另作起訖以清界限已將十五年第一案收支各款造報內有兵部行查各款業經戶文登覆餘均奉部准銷在案茲據海防支應局司道詳稱十六年分第二案收支北洋海軍經費應仍照新章接續造報前已將新支及更定各款照章造冊詳咨立案聲明舊有支款毋庸再行立案計十六年分北洋海軍報銷第二案

奏稿七十六

五

舊管項下截存銀八萬六百六十七兩零新收各省關解到稅釐銀一百三十八萬七千八百八十兩零又各處解還領用軍火價銀一千六百九十五兩零准餉協撥行營製造局造子薪工及電報學堂經費銀二萬三千九百三十兩零北洋電報官局收繳商報信資銀一萬二千五百二十六兩零扣存京平平餘銀三萬六千三百六十八兩零收回十五年分兵部刪查駐陽四蚊船並敏捷船礮弁及海軍學生劉善選薪糧等項銀一千八百四十四兩零共新收銀一百四十六萬四千二百四十六兩零連舊管共銀一百五十四萬四千九百十三兩零內除扣存平餘銀三萬六千三百六十八兩零係應解海軍衙門之款卽在十七年應領鎮遠等七船備用款內劃抵歸入七船案內列收造報又天津機器局十六年添造新式長礮鋼彈栗色火藥經費銀四萬兩由該局自

行造報分別照數登除外實計收用銀一百四十六萬八千五百四十五兩零開除項下應歸戶部核銷各款內水雷魚雷等營共支銀五萬七千三百十二兩零學堂船塢電報醫院各局廠等處員弁人等共支銀二十萬七千九百二十二兩零學堂船塢礮臺練軍等處雇用教習洋員共支銀三萬七千八百二十四兩零出洋學生及雜支等項共支銀九千一百七十一兩零准餉協撥造子薪工及電報學堂等項共支銀二萬二千八百四兩零應歸兵部核銷各款內海軍員弁兵勇俸餉共支銀二十八萬一千三百四十四兩零各海口及內河輪艇共支銀四萬九百二十五兩零各兵輪雇用教習洋員共支銀五萬一千九百九十七兩零卹賞運腳等項共支銀四萬一千五百九十八兩零應歸工部核銷各款內采買等項共支銀四十六萬二千八百七十六兩零各項工程共

奏稿七十六

至

支銀五萬七千二百三十兩零各處修理共支銀四萬三千三百二兩零各項製造共支銀十一萬三千五百二十九兩零統共支銀一百四十二萬六千三十八兩零其餘銀四萬二千五百六兩零已接支十七年以後用項無存循案造具三部分銷冊收支四柱總冊開具款目清單詳請奏咨核銷前來臣查十六年分北洋海軍經費係由海軍衙門按常年額支之款核定指撥以供計授要需遇有必須添購要件添建要工不在歲撥數內者照奏定章程本應戶請添撥惟海軍衙門同一艱窘深恐籌撥為難姑由工需雜費項下截長補短竭力騰挪湊辦值此時艱餉絀非特新增用項必加詳審卽舊有支款無不由臣督同在事各員隨時考察可省卽省至常年操防應購外洋軍械器具等項其貴賤良窳尤必多方比較始行訂購惟海軍一切用款並無例案可循亦非

他項軍需可比臣覆加查核均係實用實銷並無絲毫浮冒除各冊分送戶兵工三部並咨總理各國事務衙門總理海軍衙門外理合開具簡明清單恭摺具陳伏乞

皇上聖鑒敕部查核准銷謹

奏

再北洋海軍鎮遠定遠濟遠三鐵艦致遠靖遠經遠來遠四快船薪糧公費醫藥費並煤修采買雜支及致靖經來四船洋員薪飯等項銀兩向章按常年額支之數派員赴海軍衙門請領來津專款存儲隨時核發將動用數目咨報海軍衙門查核並將光緒十二年至十四年用款造冊請銷嗣於十五年正月起海軍各船俸餉改按海軍衙門奏定新章分別開辦所有十五年份收支各款遵照新章造冊報部業經工部核覆照數准銷其兵部疊次駁查各款於本年正月開逐一登覆專案奏請准銷各在案茲據海防支應局司道詳稱十六年分鎮遠等七船俸餉公費藥費並煤修采買雜支及四快船洋員薪飯等項銀兩應接續造報又十六年五月分起新增閩廠仿製平遠鋼甲船一隻月支薪糧銀二千三

奏稿七十六

五

百八十七兩公費銀四百四十兩又歲支藥費銀二百兩均按京平核發前經海軍衙門覆准按年籌撥其常年煤修等項即在七船備用款內勻撥應用業經奏咨立案並聲明歸入七船案內造報計十六年分鎮遠等七船俸餉公費藥費等項舊管項下截至十五年底止業經儘數動撥無存新收海軍衙門撥給鎮遠等八船俸餉京平銀二十萬兩又長蘆運司十六年分應解海軍衙門鐵路經費劃撥八船俸餉庫平申合京平銀三萬一千九百十四兩零直隸新海防例第九批捐款劃撥八船俸餉庫平申合京平銀十萬七百二兩零又第十批劃撥庫平申合京平銀七萬三千一百九十四兩零又海軍衙門找發八船俸餉京平銀二萬八百五十五兩零共實收京平銀四十二萬六千六百六十七兩零開除項下應歸兵部核銷八船俸餉公費醫藥費共支京平銀四十

萬三千六百四十六兩零其餘京平銀二萬三千二十一兩零歸入十七年分遞接造報又四快船洋員薪飯款內舊管項下十五年截存京平折庫平銀四千九百五十四兩零新收北洋海軍經費十五年分扣存京平平餘款內劃撥庫平銀一萬二千七百四十七兩零管收共庫平銀一萬七千七百一兩零應歸兵部核銷四快船洋員薪飯共支庫平銀一萬三千九百二十八兩零其餘庫平銀三千七百七十三兩零歸入十七年分列收造報又七船煤修等費舊管項下十五年分截存庫平銀十三萬一千三百五十二兩零新收北洋海軍經費十五年分扣存京平平餘款內劃撥庫平銀一萬九千六十三兩零又海軍衙門兩次發給庫平銀十八萬九百三十六兩零連舊管共收庫平銀三十三萬一千三百五十二兩零內除撥還閩廠經購平遠船配設克鹿卜礮位

子彈等件價值庫平銀五萬二千一百七十八兩零應歸閩廠造報照數登除外計實收庫平銀二十七萬九千一百七十四兩零應歸工部核銷煤修采買等項共支庫平銀十八萬六千四百六十六兩零應歸兵部核銷弁兵卹賞及運費報資暨洋員回國川費等項共支庫平銀三千二百一十二兩零統共支庫平銀十八萬九千六百七十八兩零其餘庫平銀八萬九千四百九十五兩零已接支十七年分用項無存造具兵工兩部分銷細冊四柱總冊開具款目清單詳請奏咨核銷前來臣查八船俸餉等項悉照奏定章程支給其煤修采買等項亦經臣督同海軍提督隨時考核實係操防攸關萬不可省之款始准動用惟多與洋商交涉或係估定包辦之件向無例案可循亦非他項軍需可比一切用款均已隨時咨報海軍衙門有案實用實銷並無絲毫浮糜除各冊

分送兵工兩部並咨海軍衙門外理合開具簡明清單附片具陳
伏乞
聖鑒敕部查覈准銷謹
奏

奏稿七十六

五

再黑龍江漠河金廠三年期滿在事出力文武員弁前經擇尤請獎准吏部兵部議令刪減人數復經臣於本年二月間奏請照原保人數給獎毋庸刪減茲准吏部咨覆此案所保文職一百二十九員內照異常勞績保獎者六十餘員與原定章程不符仍令刪減覆奏再行核辦等因臣查漠河金廠開辦後共出金砂六萬三千餘兩除歸還借款分給股利添募勇營餉械均由該廠取給外並提存餘利解充黑龍江軍餉銀三萬三千兩實屬辦理得法成效昭彰興利實邊莫善於此其有益於

國計民生殊非淺鮮前定保獎章程以成效之大小酌人數之多寡本未限定獎額該廠創辦以來締造經營備嘗艱苦且地居極邊瘴癘寒毒積勞病故者不少又緊接強鄰事多掣肘人皆視為

奏稿七十六

奏

畏途現礦務雖有起色事局仍益艱難若不從優保獎實無以鼓舞人心策其後效惟部臣既一再議駁臣亦未便過於拘執茲謹悉心查核刪去文職十六員武職六員至原按異常勞績請獎者亦照尋常勞績核改二十四員分別繕具清單恭呈

御覽其餘各員應請仍照原保給獎以示鼓勵該廠總分各局十餘處在事員司數百人本未能一概列保現經分別嚴加刪改按照異常勞績者文職僅二十餘員武職僅十餘員均係久著勤勞毫無冒濫實難再加刪減惟有籲懇

天恩俯念漠河金廠關繫邊防大局迥非內地尋常礦務可比准敕部照擬獎敘俾任事各員得以早邀甄錄出自

恩施特沛謹附片具陳伏乞

聖鑒訓示謹

奏

奏稿七十六

五

李文忠公奏稿卷七十六

李文忠公奏稿

卷之七十七目錄

上海機器局請獎摺

光緒十九年六月十六日

奏保劉麒祥片

光緒十九年六月十六日

運送東三省軍火車價摺

光緒十九年六月十六日

包爾請給寶星片

光緒十九年六月十六日

奏保塔布囊希里薩拉片

光緒十九年六月十六日

請准接辦賑捐摺

光緒十九年七月初一日

賑捐酌增捐銀萬兩條例片

光緒十九年七月初一日

購運南米濟京片

光緒十九年七月二十六日

劉含芳兼管營務片

光緒十九年八月十六日

中俄接電請獎俄使片

光緒十九年八月十六日

博來請獎片

奏稿七十七目錄
光緒十九年八月十六日

海防練軍請銷摺

光緒十九年八月十六日

展設新疆北路電綫摺

光緒十九年九月初十日

保送戴宗騫引見片

光緒十九年九月初十日

大臣捐助晉賑片

光緒十九年九月初十日

請撥河運漕折預撥海運漕米摺

光緒十九年九月十二日

變通學藝期限片

光緒十九年九月二十六日

報效萬壽經費摺

光緒十九年十月十八日

蘆商報效銀兩摺

光緒十九年十月十八日

嚴禁聚眾掘隄摺

光緒十九年十月二十六日

重整上海織布局片

光緒十九年十月二十六日

准軍報銷摺

光緒十九年十月二十六日

軍需交涉洋務片 光緒十九年十月二十六日

州縣墊辦兵差報銷摺 光緒十九年十一月十三日

林維源捐賑請獎摺 光緒十九年十一月二十四日

長蘆欠款展限摺 光緒十九年十一月二十四日

兩知府請付史館摺 光緒十九年十一月二十五日

宋永譽補祀昭忠祠片 光緒十九年十一月二十五日

察哈爾牛捐請獎摺 光緒十九年十二月十二日

機器局報銷摺 光緒十九年十二月十二日

奏保朱靖旬等片 光緒十九年十二月十八日

湊撥搶修近省隄河經費摺 光緒十九年十二月十八日

永定河籌辦拋甄法片 光緒十九年十二月十八日

上海機器局請獎摺

光緒十九年六月十六日

桐城吳汝綸編錄

奏爲上海機器局創造西洋新式鎗礮卓著成效有裨軍需照章擇尤請獎恭摺仰祈

聖鑒事伏查光緒十二年七月海軍衙門奏定變通保獎章程內開如有奇才異能創製軍械由該督撫考驗明確卽破格懇恩錄用又十四年八月海軍衙門奏定北洋海軍章程內開各機器局所造大小新式鎗礮與外洋所造一律准擇其尤爲出力者照異常勞績酌保等因均經欽奉

懿旨依議欽此欽遵各在案近日泰西各國以鎗礮之利爭雄角勝日異月新現新出之連珠快鎗及全鋼快捷大礮尤爲行軍守

奏稿七十七

口利器快鎗之製以奧之漫利夏鎗德之新毛瑟鎗爲最後出而最精其快礮則從前各洋廠僅能造三磅六磅小礮嗣英之阿摩士莊廠多方考究造成四十磅子大快礮爲各國所推重爭先購置臣鴻章前以上海機器局所造鎗枝均是舊式仿造英廠新式南夏鎗亦不適用因於十六年秋閒飭令專就漫利夏新毛瑟鎗兩式講求仿造該局總辦道員劉麒祥覓得兩項鎗枝並購阿摩士莊快礮一尊逐件拆卸認真考驗督率廠員華洋匠目悉心仿造竭兩年之力將鎗礮先後造成經該廠演試能與西洋所造新式一律於上年九月閒派員齎送來津臣鴻章委派軍械局道員張士珩會同各營將領督同洋教習分日逐細考察驗得該鎗膛綫六條子路甚準開放裝退極爲省手每分鐘放快自二十二出至二十五出距靶二百碼能同穿一分五釐厚鐵板並擊入後面

松木一吋四分每秒速率四百八十九密達堅緻靈捷與德國新
毛瑟相等其速率綫路更駕漫利夏之上又驗得該礮用全鋼套
箍製造隨礮鋼子計重四十五磅用德廠配造經遠來遠快船最
堅厚之鋼面鐵甲爲靶能受擊力較尋常鐵甲三倍彈子竟能深
入三四寸其速率均數六百二十九密達每分鐘可放子十二出
子彈出膛準頭極好與大沽海口購用阿摩士莊快礮出數相同
臣鴻章覆加察驗以上兩項鎗礮並能與外洋最新之式一律精
利洵爲難能可貴當飭逐漸推廣仿造以資利用至鎗礮所需鋼
料購自外洋價值既昂運費又貴該員等復仿照西法鍊成純鋼
捲成礮管鎗筒並大小鋼條精純堅實與購自外洋者無殊惟現
購鑪座僅有三噸者一具出鋼尙不能多將來經費漸充添購機
器增置廠屋就中產之煤鐵鍊西式之鋼料多製新式器械以備

奏稿七十七

二

各營領用不必取資外洋實爲自強根本至計其有裨於軍實者
誠非淺鮮竊維泰西各國鎗礮之學俱係專門名家或世代相傳
以臻極詣或逐年改作以集眾長每一器成其國家必重加賞擢
特示旌異故能才藝競奮利器日新日本蕞爾小邦於鎗礮一事
猶能竭力經營其所製造幾與西洋相埒中國地大物博獨以固
於風氣限於財力未能與彼爭長遇事仰給他人原非久遠之策
醇賢親王有鑒於此故於海軍衙門章程內一再奏請特懸此格
以勵羣才規慮至爲深遠上海機器局爲各省製造最大之廠該
局員等苦思力索不憚繁難奮勉圖功竟能於數年之間創造新
式鎗礮與西洋最精之器無異爲中國向來所未有今年五月間
日本陸軍中將川上操六游歷來津試放此鎗動色歎羨謂彼國
中村田大廠所造殊不能及乞取兩枝以爲標準是該局員等創

製軍械實能與外洋一律與海軍衙門奏定保獎之例相符自應據實

上聞籲乞

恩施以勵成勞而策後效除劉麒祥一員另片陳請外所有在事委員補用知縣江蘇試用縣丞劉家傑江蘇試用縣丞劉毓湘劉殿華成希縉李承淵陳其壽均擬請免補本班以知縣仍留原省歸候補班補用補用知州候選布經歷馮祖霽擬請免選本班以知州儘先選用候選縣丞李華張信瓛均擬請免選本班以知縣儘先選用以上九員均係最爲出力始終勤苦該局分廠十餘處承辦數百人經臣等再三核減所保僅止此數實屬無可再刪所擬官階仍未敢優於常格仰懇

天恩俯准照擬給獎足以振興軍實鼓勵人才謹合詞恭摺具陳

奏稿七十七

三

伏乞

皇上聖鑒訓示再此摺係由臣鴻章主稿合併陳明謹奏

奏保劉麒祥片 光緒十九年六月十六日

再二品頂戴江蘇候補道劉麒祥於光緒十五年夏閒委辦上海機器局到局之初卽以創造新式鎗礮及自鍊鋼料爲己任西國新出利器不以祕法示人其機括靈巧異常猝難臆測開辦之始幾無端緒可尋該員久在外洋究心製造故能精選洋匠博訪窮探考索成式參以心得督飭員匠銳意仿造無閒寒暑造成試驗稍不如法輒復拆改於兩年之內盡羣材之用竟能造成新式鎗礮並鍊就鋼料經臣等疊次考驗與西洋所造一律精堅有志竟成實非始願所及該員爲故陝西撫臣劉蓉之子志行著聞前經曾紀澤奏調出洋派充駐法參贊十年閏五月

特旨派赴江南隨同曾國荃辦理事件旋經左宗棠奏調隨赴福建總理營務歷左宗棠曾國荃穆圖善楊昌濬及臣坤一先後保薦均奉

奏稿七十七

四

旨交軍機處存記其人才可用久在

聖明洞鑒之中此次創辦鎗礮尤能力任其難於軍實攷工裨益甚大自應援照海軍衙門奏定章程奇才異能創製軍械准予破格錄用之例奏乞

恩施該員虛銜實職並無可查吉林機器局道員宋春鼇於上年八月經將軍臣長順奏保請以海關道記名請

旨簡放仰蒙

特恩允准在案劉麒祥資勞較深所造新式軍器爲中國向來所無尤非尋常製造可比應如何破格錄用之處出自

慈施特沛謹合詞附片陳請伏乞

聖鑒訓示謹

奏稿七十七

五

運送東三省軍火車價摺

光緒十九年六月十六日

奏爲順直各州縣運送東三省軍火等項車價難以常例相繩請
照關外成案造報恭摺仰祈

聖鑒事竊前因東三省創辦防務領運神機營海軍衙門軍火餉
鞘等項關係重要順直經過各州縣墊雇車價准銷無期關外州
縣接運此項車價向准作正開銷關內事同一律未便獨令向隅
經臣於光緒十六年奏請自是年起凡出京至山海關經過州縣
運解東三省練兵餉鞘軍火墊辦車價等准其各歸各任按照每
起實用數目造冊咨部核銷在於司庫地糧項下撥給歸墊業蒙
聖恩俞允並經戶部覆准在案嗣據藩司將各州縣光緒十六年
墊應過銀一萬五千八百三十七兩七錢九分九釐十七年墊應過
銀一萬八千五十七兩七錢二分九釐分年造冊詳經臣先後咨

奏稿七十七

六

部核銷現准兵部咨覆按冊開程途里數以定例每車每百里給
銀一兩之數核計浮多三四倍及四倍七分零不等礙難核准行
令刪減再行核辦等因經臣飭據藩司詳稱各州縣運送東三省
邊防軍火餉鞘因事關重要隨到隨運必須按照民間市價從優
發給方免貽誤前因挪墊賠累甚鉅奏准各歸各任按照每起實
用數目造銷是此項車價已聲明實用實銷難以常例相繩茲兵
部飭令按照例價核刪各州縣實賠累不堪該藩司前在奉天府
尹任內稔知關外州縣報銷前項車價向按每車每百里請銷銀
三兩五分零歷奉兵部奏明准銷有案關內事同一律請照關外
成案辦理以免向隅卽此尙須賠貼應飭令捐補俾示限制等情
詳請具奏前來臣查各州縣運解東三省邊防車價前因墊雇市
價較例價賠累甚鉅是以奏明按照每起實用數目造報今部駁

仍按例價核刪實難遵辦惟關外接運前項車價向按每車百里
准銷銀三兩五分有奇關內事同一律自應畫一辦理除通飭各
州縣按照三兩五分之數核刪造報外合無仰懇

天恩飭下兵部查照立案以憑造報理合恭摺陳明伏乞

皇上聖鑒訓示謹

奏

包爾請給寶星片

光緒十九年六月十六日

再北洋武備學堂鐵路總教習德國工程師包爾經該國克鹿卜
廠派令來華講求鐵路藉圖報效自光緒十六年到堂教授鐵路
各項課程盡心指示不憚煩勞俾學生均能領會頗著成效三年
之久並未支領薪水實屬廉讓可風現擬銷差回國合無仰懇
天恩俯准將包爾照總教習例

賞給二等第三寶星以示獎勵如蒙

允准卽由臣照式製給並咨總理衙門繕發執照理合附片陳請
伏乞

聖鑒訓示謹

奏

奏保塔布囊希里薩拉片

光緒十九年六月十六日

再准直隸提督臣葉志超咨稱喀拉沁王旗記名協理世襲四品塔布囊希里薩拉於光緒十七年十月閒教匪倡亂之初卽帶領蒙兵會合鄉團扼要堵剿其時逆氛甚熾圖竄建昌縣街踞以爲巢該員率領兵團在建昌迤東之他里巴營子一帶與賊力戰奮勇異常擊斃賊首楊茂林並轟斃賊黨數百名賊不得逞退踞喀拉沁窪一帶相持旬日大軍始陸續到齊當時若非該員力扼要衝遏賊西竄則建昌必爲賊踞官軍進剿難免牽掣之虞其勞績實不可泯肅清後該員奉本旗調回差遣營中於彙獎時無從查悉銜名本旗又以該員曾經隨營助剿疑已開保亦未核獎竟至遺漏此次葉志超出口巡閱道經他里巴一帶土人述及往事皆極稱該員血戰之功且惜其有勞未錄應補請奏獎等因前來臣

奏稿七十七

九

查上年勦平教匪在事出力將士皆已優獎該蒙員同一出力膽識兼優實爲出色之員未便獨令向隅仰懇

天恩俯准將記名協理世襲四品塔布囊希里薩拉

賞戴花翎以昭激勸理合會同直隸提督臣葉志超附片具陳伏

乞

聖鑒訓示謹

奏

請准接辦賑捐摺 光緒十九年七月初一日

奏為順直各屬水災甚重工賑需款浩繁籲懇
天恩俯准接辦賑捐以資接濟恭摺仰祈

聖鑒事竊查順直各屬本年伏雨過多河水漫溢窪區被淹業將
大槪情形馳奏在案恭讀六月十五日

上諭京師近日以來雨勢連綿不止十二日復大雨滂沱連宵達
旦誠恐河流驟漲近畿一帶禾稼受傷著直隸總督順天府尹查
明各屬被災之處妥籌賑撫迅即馳奏等因欽此昨又蒙
特恩截留奉天粟米江蘇江北河運漕糧分撥賑濟仰見

聖慈軫念災黎有加無已

詔書下逮薄海同欽茲據各屬陸續稟報被災州縣三十餘處順
屬以大興宛平良鄉涿州通州武清香河寶坻東安霸州甯河順

奏稿七十七

十

義為最而房山保定文安薊州永清固安次之直屬以天津靜海
新城雄縣蠡縣安州灤州高陽玉田等處為最而博野定興任邱
肅甯獻縣青縣饒陽次之此據文報已到者而言其餘驛路淹阻
尙未知被災輕重至各河漫口如永定大清南運北運瀦龍潮白
子牙鳳河灤河等處隄岸冲缺壩埝蟄陷漫沒多處上下千數里
巨浸汪洋幾無乾土近日天雖晴霽而盛漲難宣洩平地尙有
水深丈餘及數尺者災重地方房屋坍塌禾稼漂沒小民無地可
種無屋可棲蕩析流離岌岌不可終日臣接據稟報即督飭司道
分派委員馳往查辦急撫酌撥銀米核實散放其被水圍繞村莊
則令紮筏濟渡搭廠收養暫救目前之急惟自秋徂冬為日方長
水勢既未消落晚禾斷難補種約計冬賑春賑及堵築各河漫口
工程非預籌有著之款源源接濟斷難措手查上年順直復被水

災經臣奏請開辦賑捐仰蒙

恩准在案計自光緒十八年七月十六日接准部文之日起除去封印日期扣至本年八月十六日一年限滿現在災重費繁款無所出再四籌商惟有仍將賑捐展限一年接續勸辦或可稍資濟助據籌賑局司道詳請核奏前來臣查本年順直水勢之大災區之廣實較十六年爲尤甚直隸爲缺額之區災歎頻仍庫儲支絀而

畿輔重地民生疾苦上廛宸念不得不多方籌畫力圖補救籲懇

聖恩准將現辦賑捐自本年八月十六日限滿後再行接展一年所有章程條款悉照前案辦理其捐銀萬兩請

旨給獎一條已月片奏懇

奏稿七十七

十一

恩施准予收辦藉資鼓舞統自接辦之日起予限一年限滿即行停止所收捐款隨時會商順天府尹分別災區輕重酌量勻撥惟各省物力已窮賑捐久成弩末此次展限接辦係於無可設措之中冀收寸效將來捐數能否踴躍殊無把握臣惟有竭力招徠廣爲勸募總期多集一分之款即災民多受一分之惠儻款不敷用再由司局各庫隨時設法籌湊以濟急需所有順直等處水災甚重籌款維艱仍請接辦賑捐藉資賑撫緣由謹恭摺由驛馳

奏伏乞

皇上聖鑒訓示遵行謹

奏

賑捐酌增捐銀萬兩條例片

光緒十九年七月初一日

再查光緒十六年順直地方被水災重賑繁戶部議准開辦賑捐於常行捐例之外酌增捐銀萬兩請

旨給獎一條上年夏閒直省復遭水患經臣奏開賑捐仍請援案收辦仰荷

聖慈允准嗣於十二月閒接准部咨以春融伊邇賑務較緩於前所有捐銀萬兩優獎一條奏請先行停止奉

旨依議欽此欽遵知照前來維時春賑尙未就緒而以工代賑之處需款尙多旋又欽奉

寄諭飭籌山西邊外賑款來源驟短竭歷萬分因部臣甫經議停未便遽行瀆請騰挪應付實已力盡筋疲方冀年穀豐稔民困稍蘇即可依限停捐無如夏閒霖雨兼旬水勢之大較十六年爲尤

奏稿七十七

十一

甚災賑情形已於請展賑捐摺內詳細陳明惟查順直賑捐開辦多年各省勸募至再至三凡有可設法之處無不羅掘殆盡即使竭力招徠而所收祇銜封貢監零星湊集爲數無幾仍恐不足濟事當此億萬災黎嗷嗷待哺非有大批捐款源源接濟溝壑餘生斷難存活近來供億浩繁中外度支同虞不給未敢請撥部帑致令籌畫爲難臣督同司道再三籌議並與各省督撫臣往返電商均以賑捐優獎一項必須照案收辦方可稍資鼓舞即戶部當日酌增此條亦深知外閒集款維艱非此不足以收速效近畿密邇京師根本所繫非他省情形可比賑需至要民命至重不得不廣籌拯救之方合無籲懇

天恩俯准將捐銀萬兩請

旨給獎一條仍照光緒十六年成案一體收辦出自

慈施逾格此因賑款緊急萬不得已爲一時權宜之計應俟賑務
稍鬆限期屆滿卽行停止以示限制理合附片陳請是否有當伏
乞
聖鑒訓示施行謹
奏

購運南米濟京片 光緒十九年七月二十六日

再欽奉本年七月初四日

寄諭給事中余聯沅奏京城糧價日昂請設法平糶一摺近畿一帶大雨過多河水漫溢田禾被淹以致京師糧價日昂小民日食維艱允宜早為籌畫著孫家鼐孫楫趕緊設法籌款平糶所需南米並著李鴻章設法運京以資接濟等因欽此 臣查六月閒霖雨兼旬各河漫決平地水深丈餘順直災象之重較十六年為尤甚京城糧價昂貴窮民乏食必須招商運米糶賣藉平市價十六年曾飭招商局道員黃建完選舉正派米商購運白米赴京平糶辦法極為妥善當飭循舊辦理府尹來電意見亦復相同旋據該道招得殷商在津陸續湊集大米雜糧源源運京以應急需惟天津產糧無多向須取給南省上年蘇皖一帶秋成僅稱中稔糧價增

奏稿七十七

十四

於平時商人販運北來加以應完釐稅成本已重無利可圖來源日少畿境連年荒歉民間本乏蓋藏此次復患沈災以致市僧居奇米糧日貴不得不廣籌采運接濟民艱已分飭津滬關道並招商局出示招商速赴江南江北產米素豐之區采買米石航海北來多多益善分起運京以資平糶應如該事中所奏由 臣 發給護照沿途經過關卡一體免完釐稅如須酌發運本即由籌賑局設法湊撥利之所在商販爭趨將見南米來源日旺京津市價自平於貧民生計大有裨益除分別咨行查照飭遵外理合附片覆

陳伏乞

聖鑒謹

奏

劉含芳兼管營務片

光緒十九年八月十六日

再山東登萊青道劉含芳於十八年五月奉

旨調補斯缺該道自北洋辦理海防卽派駐奉天旅順口綜理水陸營務會辦船塢及各礮臺工程創設魚雷營操練雷艇添設水雷學堂分建水陸師需用鎗礮器械藥雷子彈各庫均能認真督籌條理精密旅順與煙臺對峙爲北洋門戶要衝尤爲海軍根本之地臺陽廠庫各工甚關重要該道艱難締造歷年最久經手事件最多茲已逐件清釐就緒由臣遴派妥員接管並咨明山東撫臣飭赴本任現值籌辦煙臺膠州防務添築礮臺與旅順大連灣威海衛南北聲勢聯絡登萊青道常駐煙臺兵輪駛赴各口均尙便捷應仍飭該道兼管營務於地方公事之暇隨時就近周歷各處會商各將領整頓工操實於海防全局有裨理合附片陳明伏

奏稿七十七

五

乞
聖鑒謹
奏

中俄接電請獎俄使片

光緒十九年八月十六日

再中俄議接海蘭泡春等處陸路電綫始於俄國前任使臣庫滿因丹國阻撓未能定議嗣俄國續派使臣喀希呢來華復申前說准總理各國事務衙門來咨經臣飭派總辦電報事宜調補津海關道盛宣懷再與商訂接綫條約當會議之始彼此各圖利益兩不相讓各國多懷嫉妒從旁唆阻加以中俄陸綫接通有礙英丹兩國海綫權利更多牽掣喀希呢兼充丹使亦覺左右為難乃竟能自始至終力持原議仍按照庫滿底本商酌變通頗為平允所訂接綫條約十款業經臣咨商總理衙門奏准於光緒十八年七月先在天津畫押並

奏請蓋用

御寶彼此互換在案現在海蘭泡水綫已於本年六月初二日接

奏稿七十七

十一

通琿春陸綫亦於七月初四日接通照章遞報據津海關道盛宣懷詳請將該使臣喀希呢等奏獎前來臣查海蘭泡春水陸兩綫既已接通遞報此後中俄陸綫出洋之電報皆由丹英海綫出洋電報內分其電利爭執必多喀希呢兼充丹國使臣於議訂接綫條約持平理論不致意存偏袒其參贊雷明隨員巴幅羅福亦均能和衷襄理克底於成洵屬兩有裨益電綫既經互接將來電務交涉甚繁自應酬其先事之勞以策後來之益可否仰懇天恩准將俄國駐京使臣公爵喀希呢照世爵例

賞給頭等第三寶星署參贊前代理使臣雷明照代理公使例

賞給二等第三寶星隨員巴幅羅福照正使隨員例

賞給三等第一寶星以示獎勵除俟奉

旨允准後臣卽分別照式飭製咨送總理衙門轉給並由總理衙

門繕給寶星執照一併照會俄使外理合附片具陳伏乞
聖鑒訓示謹

奏

奏稿七十七

七

博來請獎片

光緒十九年八月十六日

再電報總局洋員丹國人博來係大北公司所用旋又辭退光緒十年經盛宣懷招致到局凡與各國交涉電務常令隨同參酌忠於所事悉協機宜此次襄辦中俄接綫尤能殫心竭慮不辭勞怨洵屬異常出力現在俄國使臣喀希呢等經臣月片請

賞寶星該洋員係電局募用之人出力較多未便沒其勞勩查該洋員已於東三省造綫出力案內奏蒙

賞給三等第一寶星此次可否仰懇

天恩賞給該洋員博來三品頂戴藉資鼓勵理合附片陳請伏乞

聖鑒訓示謹

奏

海防練軍請銷摺 光緒十九年八月十六日

奏爲查明天津海防練軍光緒十八年分收支各款照章造冊請銷恭摺仰祈

聖鑒事竊據天津支應局司道詳稱天津練軍及大沽葛沽北塘海口各礮臺防營並雲字營馬隊營務處小隊應需餉項向由津海關六成洋稅招商局稅洋藥釐捐東海關協餉長蘆鹽斤復價正雜課各項內隨時籌撥樽節支放嗣因東海關六成洋稅湊付洋債無款協解改在天津釐捐項下動用經部覆准業將光緒十七年以前收支款目疊次奏咨准銷在案所有十八年津防各營隊應支廉俸公費餉乾薪糧等項並大沽北塘各海口礮臺經費以及設局辦公租賃民房添置帳棚旗幟號旌采買製造軍火子藥悉照奏定章程歷年准銷成案核實支放茲造具光緒十八年

奏稿七十七

九

分收支細數清冊詳請

奏咨前來臣逐加覆核自光緒十八年正月起到去年底止舊管項下實存銀二千三百二十二兩零新收各款並本案扣收平餘共銀四十萬八千一百二十兩零開除支款悉照定章毫無浮濫應歸戶部核銷銀三十七萬一千五百八十兩零工部核銷銀三萬七千一百七十九兩零合共銷銀四十萬八千七百六十兩零應存銀一千六百八十二兩零已支發十九年餉項列入下屆滾接造報其奉部核准歷年墊支不敷銀二萬一千一百七十八兩零仍於冊內列報俟戶案核辦所有光緒十八年天津海防練軍收支餉銀請銷緣由除清冊咨部外理合恭摺具

奏伏乞

皇上聖鑒敕部核銷謹

奏

奏稿七十七

三

展設新疆北路電綫摺

光緒十九年九月初十日

奏爲籌辦展設新疆北路電綫以速邊報而竟全工恭摺仰祈
聖鑒事竊臣於上年十一月間奏請接辦新疆省城及喀什噶爾
電綫聲明伊犁電綫再行續議接展查新疆巡撫駐紮迪化爲天
山南北兩路總匯之區南抵喀什噶爾爲提督所駐北抵伊犁爲
將軍所駐並是極邊重鎮與俄羅斯及各回部英國屬境三面接
壤交涉之事日繁南北兩路情形均極重要亟應分設電綫以期
消息靈通惟以道路縣長需費較鉅祇可分段籌辦前因帕米爾
界務未定南路邊報尤急是以先議接辦喀什噶爾一路現迪化
電綫已於六月間竣工喀什噶爾期趨辦如一切應手冬閒計可成
事邊外設綫以運料爲最艱伊犁北路勢須展設即應乘此接續
趕辦可省再舉之煩臣與陝甘督臣楊昌濬新疆撫臣陶模往返

奏稿七十七

三

電商意見相同並接陶模電稱迪化至伊犁官路一千五百里捷
路可一千一百餘里運木之費約二萬餘兩以後迪喀什三處養
綫經費每年約一萬五六千兩均應由新疆籌備至歲修綫料仍
須多爲購儲等語當即督同總辦電報事宜津海關道盛宣懷詳
細籌議此次迪喀什兩路電工經費並運購物料係按照驛路估計
現經逐段量勘乃知關外道里較內地稍爲短縮該員等極力撙
節料費兩項尙有存餘計由迪至伊捷路一千一百餘里卽就存
餘之料爲展接之需惟運料愈遠腳價愈昂經費恐有不足通盤
詳核短絀尙屬無多但物料繁曠設有要件不敷應付無從購覓
便須停工以待且設綫之後仍須籌備歲修自應將一切用料從
寬估計運往存儲不致臨時支絀臣查所擬辦法甚爲核實物料
均出節省款項無庸多籌此綫接成則新疆南北兩路一氣貫注

全局皆靈更無偏而不舉之患於邊防大局深有裨益趁此封凍之前飭令剋日添購料物陸續運往一俟喀綫工竣卽接續趕辦委員匠役俱係熟手不須另調事半功倍並由新疆撫臣照案分飭沿途營縣預爲采購木料按里分屯以備取用各項經費核實動支如有不敷另行籌給事竣彙案報銷其購運木料及常年養綫修理等費應由新疆撫臣專案具奏外所有籌辦接展伊犁電綫緣由謹會同陝甘督臣楊昌濬新疆撫臣陶模合詞恭摺具陳伏乞

皇上聖鑒訓示謹

奏

保送戴宗騫引

見片

光緒十九年九月初十日

再三品銜候選道戴宗騫於光緒十年閏五月經前會辦北洋事宜今湖南撫臣吳大澂專摺保奏奉

上諭吳大澂奏遵旨保薦人材各摺片戴宗騫著俟經手事件完竣後送部帶領引見等因欽此旋經臣派赴山東威海衛辦理海防創造礮臺上年臺工辦竣復經吳大澂奏明就近由臣給咨赴部奉

硃批著照所請吏部知道欽此臣查戴宗騫籍隸壽州久在臣軍襄辦營務嗣經吳大澂調赴吉林辦防統領綏軍旋又調防畿東沿海一帶十三年兼統鞏軍移防威海衛督修南北岸礮臺結構精巖壁壘一新操練新式鎗礮水雷均極嫻熟足資戰守臣於十七年八月校閱海軍案內以該員志趣廉正經濟宏通文武兼資

深堪倚任附片奏保奉

奏稿七十七

五

硃批著交軍機處存記欽此伏查近年各省保送引

見人員多因勞績敘保戴宗騫係經吳大澂以人材特薦與尋常勞績保案不同且海內承平日久文員知兵者已少一旦設有緩急深慮驅使乏人臣追溯咸同之交用兵二十餘載卒賴文員收功則及時儲備將帥之才尤為要務戴宗騫久歷艱苦親臨行陣忠實果毅曉暢戎機歷辦海防兼通洋務尤為文員中不可多得之選現在威海防務布置略定自應遵照前奉

諭旨給咨赴部引

見應如何錄用之處

朝廷自有權衡非臣所敢擅擬除俟赴引事竣仍令回防襄助外理合附片陳明伏乞

奏
聖
鑒
謹

奏稿七十七

三四

大臣捐助晉賑片 光緒十九年九月初十日

再本年二月閒欽奉

諭旨以山西邊外災情甚重飭令籌款派員協賑等因遵經督飭籌賑局司道勸集捐款派委山東候補知州潘民表等馳往確查散放業將辦理情形集捐數目先後陳奏在案茲據籌賑局司道詳稱內有大學士_臣額勒和布等會同各部院大臣倡率京外官紳共捐京平松江銀一萬六千四百二十五兩零除撥交辦賑京紳翰林院修撰黃思永三千五百兩外餘均分批匯津解交潘民表等兌收散放並據聲稱前項捐款均毋庸核獎請奏明立案前來_臣查此次晉邊猝遭奇荒待賑孔亟該大學士等情切救災捐資倡率南北義賑各紳聞風響應用能集成鉅款濟助要需全活災黎無算實屬功德及民力顧大局所捐銀兩雖稱不敢邀獎而

奏稿七十七

三

其公忠體

國之忱亦未便壅於

上聞除俟查明收支實數再行開單奏銷外理合附片陳明伏乞

聖鑒敕部查照謹

奏

請撥河運漕折預撥海運漕米摺

光緒十九年九月十二日

奏為順直水災過重春賑撫需款甚鉅援案變通辦理籲懇
天恩賞撥江蘇江北河運漕折銀兩並預撥江蘇明春海運漕米
以濟要需恭摺仰祈

聖鑒事竊查本年順直地面大水為災各河漫溢被淹州縣四十
餘處民情困苦異常仰荷

特恩截留本屆江蘇江北河運漕米十萬石奉天粟米一萬四千
石並准展辦賑捐以資接濟業將籌辦賑撫情形疊次陳奏在案
伏查此次畿境水勢之大受災之重為近年所未有應賑戶口不
下數百萬前蒙

恩賞漕米順直兩屬均勻分派外並將各省解到捐項及司局撥
款隨時籌付現正遴派委員會同各該州縣確查戶口以備接放

奏稿七十七

五

冬賑刻下各屬高地水漸消退明春雖可種麥然收成總在四五
月青黃不接為日甚長窪區積水驟難洶復更無麥收可望冬賑
之後必須接辦春賑方免委填溝壑至各河漫口如南運北運永
定大清子牙瀦龍潮白等河險工林立除永定河堵口大工另請
撥款修辦其餘均須擇要趕緊堵築明歲春融並應挑濬河身加
培隄岸俾附近災民藉以備趁餬口統計工賑兩項需款浩繁不
敷甚鉅直隸本缺額之區豐年度支尙虞不給況值災歉頻仍羅
掘殆盡各省賑捐祇能應一時之急日久斷難為繼此外別無款
項可籌順直切近

京師夙蒙

加惠今飢黎嗷嗷待哺望

澤尤殷臣等目擊災情不得不為未雨綢繆之計溯查光緒十年

三十四十六等年均因水災奏蒙

恩准截留南漕辦理賑撫十七年春撫案內並蒙

賞撥海運漕米十六萬石本年順直災況較前數屆爲更重自應援照成案仰乞

恩施惟南省海運漕米到津約在三月驗兌剝運輾轉需時冬賑實難濟用查江蘇江北每年籌辦河運漕米各十萬石均於秋冬之交由辦漕州縣徵解折價分赴產米之區采買兌運本年收成豐稔冬漕自必照辦現擬乘該省未經采買之先籲懇

天恩賞撥江蘇江北來年應解河運漕米各五萬石

飭下該督撫臣將前項漕折銀兩迅速核明提解所有隨漕輕齋茶果筒兒錢等項及由蘇運津由津運通剝價運費並經剝耗食米石請

奏稿七十七

五

旨照歷屆成案飭由各該糧道按照米數核扣撥解津貼賑需如此變通辦理在南省毫無出入而順直得此款項及時散放冬賑足濟急需裨益大局非淺抑臣更有請者本屆災區過廣民困甚深明年春賑必須寬爲籌備現請漕折銀兩仍恐不敷應用擬懇恩准預撥江蘇海運漕米八萬石俟明春運抵天津就近截留其隨漕輕齋筒兒錢等項並由津運通耗米運費亦照案一併核解以資接濟約計蘇省起運米數較多於京倉尙無所損以上兩項銀米解到後順直仍當各半分撥由臣等督飭印委各員核實妥辦不准稍有弊混如蒙

俞允應請

特旨宣示則

恩出自上益足固民志而廣

皇仁所有籌辦冬春賑撫請撥江蘇江北河運漕折銀兩並請預撥明春江蘇海運漕米各緣由臣等爲拯救民命起見是否有當理合會同兼管順天府府尹臣孫家鼐順天府府尹臣孫楫恭摺由驛具陳伏乞

皇上聖鑒訓示施行謹

奏

奏稿七十七

天

變通學藝期限片 光緒十九年九月二十六日

再查總理海軍衙門奏定海軍章程摺內聲明章程容有未備及臨時應行變通者隨時酌擬具奏等因欽奉

懿旨允准在案茲據北洋海軍提督丁汝昌呈稱章程內原定駕駛學生在堂習業四年畢業派上練船學習船藝一年送回學堂再習三月然後撥入鎗礮練船再學三月考校如式派歸兵船差遣補用等因查學習船藝鎗礮原定期限太促學習甫得門徑即改肄別業恐有未精難免功虧一簣當日海軍創設在在需材欲其速成以供驅策故不能寬予限期現在天津學堂學生日增威海學堂學生亦將畢業又有北京內學堂學生將次上船人材不患不多惟在力求精邃擬變通舊章將京津兩學堂學生畢業後即先派入鎗礮學堂學習六箇月考校如式分別等第填給執照

奏稿七十七

完

再派上康濟練船學習魚雷水雷各種技藝六箇月考校給照然後派上威遠練船學習船藝並令隨船廣歷東南洋一帶考究風濤沙綫寬限兩年俾臻精進其春秋考校仍照章分別等第統以三年為期諸藝學畢業集各照擇其最優者以千總候補次者以把總候補加儘先字樣如此量為變通年限稍寬藝業必更精到且分班上船學習亦免擁擠之虞其威海學堂學生本已兼習鎗礮仍照定章辦理等情呈請核辦前來臣查鎗礮船藝極難精熟欲究其精微之奧必寬以學習之期該提督所擬變通辦法較原限計寬年半為時亦不過久而學生藝業更可精益求精自為因時制宜期收實效起見於造就海軍人材不無裨益除咨海軍衙門兵部立案外理合附片陳明伏乞

聖鑒訓示謹

奏稿七十七

三



報效 萬壽經費摺 光緒十九年十月十八日

奏為籲懇

天恩仰祈

聖鑒事伏念來歲恭逢

慈禧端佑康頤昭豫莊誠壽恭欽獻皇太后六旬萬壽普天同慶

薄海臚歡中外臣工咸思勉效微誠共襄

盛典恭查乾隆年間歷次恭辦

慶典成案中外諸臣呈請祝

嘏均經奏明請

旨遵行前准戶部咨開總辦

萬壽慶典王大臣等會奏中外臣工報效工需酌擬分交數目一

摺奉

奏稿七十七

三

旨依議欽此又准戶部咨開內務府會奏分段點設景物一摺聲

明如有增添之處再行奏辦等因又在京王公及閣部九卿先後

奏請

恩賞地段點綴景物經壇共申叩祝奉

旨准交內務府辦理等因欽此竊維京外事均一體邦畿地冠九

州臣久領封疆近依

殿陛受

恩至渥被

澤最先應偕衢巷之歌謠上頌

宮闈之福祐現辦工段若須添設原擬經費或有不敷查乾隆二

十六年大學士傅恒等奏明各段點景交納銀數職名單開各省

督撫每省交銀三萬兩仰惟

先朝俯允疆臣呈進銀兩固有

成憲昭垂臣謹率同直隸提鎮司道等於王大臣前次奏定報效經費分交數目外敬遵成案再籌集銀三萬兩以備添設地段點綴景物之需籲懇

賞收俾得各獻悃忱莫名抃舞再查傅恒等原奏稱外省督撫向俱派員來京該員等辦料鳩工均非素所熟悉以至辦理周章而糜費亦不可枚舉請仍由該大臣等總司大事等因現在外省各員於京中應辦事宜尤多隔膜合無仰懇

天恩俯准將此項銀兩仍

飭交內務府辦理無庸各省派員前往以期妥愼而杜虛糜所有遵照成案續請報效經費緣由理合會同兼管順天府府尹臣孫家鼐順天府府尹臣孫楫恭摺具陳伏乞

奏稿七十七

呈

皇上聖鑒訓示施行謹

奏

蘆商報效銀兩摺 光緒十九年十月十八日

奏爲長蘆鹽商報效銀兩恭摺仰祈

聖鑒事竊臣准戶部咨開辦理

萬壽慶典王大臣等會奏明歲恭逢

慈禧端佑康頤昭豫莊誠壽恭欽獻皇太后六旬萬壽率土臚歡

查乾隆年間各省鹽商皆有捐輸款項由督撫奏明請

旨准其報效此次各商如有照案陳請者應由各督撫奏明請

旨遵辦等因奉

旨依議欽此欽遵咨行到直當經轉飭遵照茲據長蘆鹽運使李

邦楨詳稱據綱總商人楊俊元王守善等聯名稟稱商等世沐

湛恩躬逢

景運欽惟

奏稿七十七

三

慈禧端佑康頤昭豫莊誠壽恭欽獻皇太后昌辰介祉

周甲延祺

治鞏金甌

闔澤覃敷於八表

輝騰玉券嘉祥翕集於

萬年固已慶洽寰區況復近依畿甸商等業同煮海情切歌衢側

間布綵

天街欣覩雕梁之耀日竊願飾觀

京邑助成畫棟之連雲雖庀料鳩工非云稔習而獻芹呈曝冀竭

愚忱謹公捐銀十萬兩稍效壤流之細藉攄葵藿之殷請轉詳具

奏等情前來臣查蘆綱引目多滯商務久疲疊蒙

聖恩優加調劑停引既寬其期限積欠更緩夫催科課力稍紓眾

情同感所捐銀兩委係出於至誠合無仰懇
天恩准其報效如蒙

俞允卽飭運司令該商等將所捐銀兩呈繳運庫聽候委解內務
府兌收辦理謹繕摺具陳伏乞

皇上聖鑒訓示謹

奏

奏稿七十七

三四

嚴禁聚眾掘隄摺 光緒十九年十月二十六日

奏為直隸沿河居民聚眾掘隄以鄰為壑嚴定地方官疏防處分恭摺仰祈

聖鑒事竊准軍機大臣字寄光緒十九年九月初二日奉

上諭本日據孫家鼐孫楫奏文安大城兩縣士民因安州匪徒扒隄被淹來京呈控一摺並據鴻臚寺卿劉恩溥陳奏該二縣民人呈訴情形大略相同匪徒聚眾挖隄情殊可惡著李鴻章派委大員馳往該處查勘確情嚴拏匪犯照例懲辦並妥籌辦法詳定章程不准以鄰為壑貽害民生至災民恃眾構訟儻查有徇勒同行等事即將為首之人嚴拏懲辦以儆刁風等因欽此臣查本年六月間大雨兼旬大清河瀦龍拒馬等河水勢盛漲奔騰下注又因永定河南上汎漫口渾流竄入清河宣洩不及穿越南隄匯歸

奏稿七十七

三五

西淀水勢愈漲愈高沿淀居民廬舍田禾盡淪巨浸七月十一日夜淀民聚眾將任邱縣裏隄地面之千里隄偷挖決口二道疊飭清河道潘駿德嚴拏匪犯搶堵口門旋將該決口於八月十四日堵築合龍而挖隄之犯尙未就獲又添派候補道衛杰前往會同訪拏懲辦至下游之文安大城被水各村糧租早已停徵又從優籌給賑撫體恤不為不周乃竟結隊成羣赴京構訟顯有奸民逼迫同行已飭將為首之原告宮變等傳案解省訊辦俟究明確情再行酌懲竊維直境沿河各處地多低窪每遇盛漲即被淹浸小民不安義命挖隄洩水貽害鄰封其罪固不可寬然使地方官實力籌防認真緝辦何敢輕於嘗試欲使沿河無挖隄之犯其責成仍在於官查挖決河防圩岸律有盜決故決之分盜決者罪止杖一百徒三年故決者罪止杖一百流三千里因而殺傷人者盜決

則滅鬪殺傷二等故決者以故殺傷論其有抗拒巡兵挖隄決口
糜帑害民情節較重者例內雖無作何治罪明文查有道光十二
年南河龍窩汛十三堡奸民陳端等強挖官隄分別擬以斬絞成
案可援立法本已周備定例亦極森嚴直隸聚眾挖隄之案多係
上游被淹移害下游或因河淀盛漲移害隄外民田地方官勘驗
查辦若係縣屬之民盜決本境之隄提犯嚴懲辦理尙易其有界
分兩縣一經扒挖此縣受害向彼縣提犯而挖隄奸民往往混推
村眾承認無人卽嚴訊地保鄉長非以衅起一時狡飾卽以黑夜
人多無從辨認爲詞爲首及幫同扒挖之犯每至無從拏解辦理
殊多掣肘地方官事前疏於防範失事以後又以挖隄之犯俱係
被淹情急可憫之民類多酌量示懲從寬了結以致愚民益無顧
忌紛紛效尤此直隸沿河居民一經水淹動輒聚眾挖隄之積習

奏稿十七

五

也臣督同臬司周馥悉心核議嚴禁挖隄不在多設治罪科條而
在嚴定疏防處分應請嗣後直隸奸民聚眾挖隄之案除首從各
犯仍分別按律定擬毋庸另設科條外其疏防挖隄之地方官但
經決口過水漂沒田禾財物者如將案內幫同扒挖及聽從糾人
等犯拏獲過半兼獲首犯按律懲辦免其議處其有獲犯尙未及
半及首犯在逃未獲者卽照盜案以失事之日起扣限四箇月題
參疏防四參不獲將承緝州縣印汛官降一級調用該管府廳道
均照盜案督緝兼轄統轄之例議處如有殺傷多命者從重照致
斃多命之例查辦儻係兩縣交界鄰封關提人犯仍按隔屬關提
人犯例以文到之日爲始限二十日內拏解如逾限不獲照隔屬
關提命盜等案重犯分別擬以罰俸降級如此嚴定處分庶各州
縣自顧考成咸知警戒遇案認真懲辦庶聚眾挖隄之風可期漸

奏
熄矣所有遵議緣由是否有當理合恭摺具陳伏乞
皇上聖鑒訓示謹

奏稿七十七

七

再臣於光緒八年因華商稟請分招商股在於上海設立機器織布局以華棉紡織洋布酌輕成本抵敵洋產當經

奏准變通稅釐專章在案上年復派紳商添籌資本建廠開機每日夜已能出布六百疋銷路頗暢正擬推廣紡紗漸收利益乃據江海關道稟報九月初十日該局清花廠起火適值狂風施救不及廠貨被焚當即派員會查所剩基地局房估價攤派惟查洋貨進口以洋布洋紗為大宗光緒十八年洋布進口值銀三千一百餘萬兩洋棉紗進口值銀二千一百餘萬兩中國出口絲茶價值不能相抵布縷為民間日用所必需其機器所紡織者輕輒勻淨價值尤廉故遠近爭購豈知多銷一分洋貨即少用一分土產是以因勢利導不得不用機器仿造必使所紡之紗與洋紗同所織

奏稿七十七

三

之布與洋布同庶幾華棉有銷路華工有生機華商亦沾餘利此事斷難中止亦難緩圖應仍在上海另設機器紡織總局籌集款項官督商辦以為提倡並釐訂章程號召華商多設分廠以資推廣方可以土產敵洋貨力保中國商民自有之利權謀始圖成得人尤難臣查津海關道盛宣懷歷辦輪船招商局及各省電報局著有成效於商務洋務尚肯苦志研究現值津河將封關權事簡擬派令暫行赴滬會同江海關道聶緝槩商明前辦紳商將前局妥為結束截清界限分籌資本一面規復舊局一面設法擴充俟該道等籌辦稍有頭緒隨時續

奏除札委候補道黃建筦暫行代理津海關篆外所有上海織布局派員續籌辦法以敵洋產而保利權緣由理合附片具陳伏乞

聖鑒謹

奏稿七十七

三九

淮軍報銷摺

光緒十九年十月二十六日

奏爲光緒十八年分淮軍收支款目列爲第二十一案造冊報銷繕單恭摺仰祈

聖鑒事竊照淮軍收支款項業經截至光緒十七年十二月底止列爲第二十案報銷於光緒十八年十月二十八日具奏奉

硃批該部議奏單併發欽此旋准部復按冊核銷在案伏查淮軍分駐直隸沿海各口並奉天之旅順口大連灣山東之威海衛等處計護衛親兵武毅仁盛銘楚護軍親慶馬步水師共五十一營同水陸各哨棚併護運餉械弁勇統歸淮軍案內造冊彙總請銷今自光緒十八年正月起截至是年十二月底止列爲第二十一案所有統領營哨官弁員名勇夫開收總數駐防處所先經造冊分咨軍機處暨戶兵工部備查又將支給正雜款項增裁數目遵

奏稿七十七

單

照新章每三箇月開報一次咨送各部查核其淮軍馬步水師各營並隨營辦事支應等差文武官弁親兵勇夫薪費口糧倒補馬匹柴薪車價駝騾餵養卹賞水陸轉運價腳夫工采辦製造用款油艙船隻經費犒賞正雜各款均循前案楚軍營制與奏定章程歷屆准銷例案分別截清起止所開銀數概按湘平折實庫平接續造報飭據淮軍報銷局司道逐款清釐查核舊管銀三十七萬二千八百十七兩一錢有奇新收銀二百四十八萬八千一百五十四兩七錢有奇登除並附銷銀三十八萬一千六百八十四兩六錢有奇開除正雜等項遵照部議酌定軍需報銷章程各歸各部核銷計應歸戶部核銷銀二百萬六千四百三十八兩四分有奇應歸兵部核銷銀三萬三千二百三十九兩九錢有奇應歸工部核銷銀七萬八千五百六十二兩四錢有奇統共請銷銀二百

十一萬八千二百四十兩四錢有奇應截存銀三十六萬一千四十六兩八錢有奇已接支光緒十九年正月起淮軍馬步水師營哨正雜餉項並購製中外軍火器械工價預儲軍米等項動放無存歸於後案舊管項下滾接造報等情具詳請

奏前來臣查淮軍各營分駐直隸天津大沽北塘蘆臺至山海關沿海一帶並奉天之旅順口大連灣山東之威海衛各海口等處修築礮臺擇要扼守練習後膛鎗礮水雷魚雷各新法采用西洋利器講求制勝機宜俾北洋全局固若金湯聲威既張敵情自懾實為消患無形之計各營分布海疆千餘里內衛

京畿門戶外控藩屬鄰邦有事得資應援餉項乃計口授食之需必須按期給發歷屆報銷案內截存銀兩皆係設法節縮並將月餉酌量緩欠誠以北洋海防關係重大無時敢忘戰備不得不稍

奏稿七十七

聖

留餘地藉應急需現計欠餉仍有一百五十九萬一千二兩有奇若將截存銀兩儘數抵補不敷甚巨況次年各軍食米須先期發價赴南省購運方免臨時缺誤此項米價向在截存項下酌撥近因各省關額解准餉短少往往入不敷出遂至截存銀兩動放無存惟有隨時諄催實力籌解冀免遇事束手所有造報十八年正雜款項均係循照歷屆准銷成案撙節支發實用實銷並無絲毫浮冒除分造細冊咨送各部核銷並將以後用款接續造報外理合專摺具陳並繕簡明清單恭呈

御覽伏乞

皇上聖鑒謹

奏

再准軍海防各營洋鎗礮隊教習人等辛工礮費輪船薪糧並購買洋軍械價值運解礮火輪駁各船水腳及天津行營機器製造局委員等薪糧公費工匠工食物料購價等項多與洋人交涉無例可循至操練後膛洋礮拉礮車馬餵養夫工係照奏定章程倒補馬匹例價分別核實支給業將截至光緒十七年十二月底用款附片

奏銷在案伏查此次造報光緒十八年正月起截至是年十二月底止第二十一案內前項各款遵照新章將增裁支用數目彙入季報清冊先後咨部立案茲據該司道等按款復加查核均係照案接續支給並奉文飭發毫無浮冒遵章將支用款目各歸各部核銷計應歸戶部核銷教習人等薪糧公費匠工拉礮馱運車馬

奏稿七十七

四

餵養等銀十一萬三千二百七十四兩四錢有奇應歸兵部核銷輪船薪糧夫工船價運腳保險費倒補馬價等銀三萬六千一百八十五兩六錢有奇應歸工部核銷油飾小修礮費購置外洋各項物料器具價值等銀四萬六千六兩一錢有奇共計請銷銀十九萬五千四百六十六兩二錢有奇照案分晰另造支銷細冊詳請附

奏前來臣查前項准軍各營洋鎗礮隊教習通事工匠人等辛工購買外洋物料價值運腳各款多與洋人交涉無例可循仍應查照歷屆成案據實請銷除將細冊咨送總理衙門戶兵工部核銷外伏乞

聖鑒謹附片具

奏

州縣墊辦兵差報銷摺

光緒十九年十一月十三日

奏爲查明直隸各州縣供應光緒十年起至十二年止兵差墊用銀兩照章報銷恭摺仰祈

聖鑒事竊查光緒九年十二月准兵部咨核覆直隸各州縣供應兵差酌議報銷章程應將冊開廩給跟役馬匹等項淨多者刪除凡遇應付兵差支給馬匹不得再付車輛如有應付車輛亦不得再支馬乾其車輛雇價按照定例開銷不得再有守候外銷名目帶勇各官以及勇丁原營支給薪糧公費沿途不得再行應付廩給口糧且勇營均有長夫尤不應另給跟役車馬致涉重複等因當經行司核明刊章移行各屬一體遵辦業將光緒七年至九年各州縣供應兵差銀兩奏報並造冊咨部准銷在案茲據藩司裕長將直隸各州縣光緒十年正月起至十二月底止供應

奏稿七十七

聖

兵差墊用銀兩查照例案新章分別准駁刪減按起聯站詳細旬稽妥細核造計供應調撤官兵暨運送軍火餉械及采買戰馬等差共請銷車價船價繆夫口糧實銀二萬九千四百九十八兩八錢六分八釐官兵廩給口糧實銀九百一十九兩九錢七分四釐官兵房價實銀一千九百八十九兩六錢九釐馬差乾折棚廠賃價實銀三千八百七十六兩七錢五分以上共請銷實銀三萬六千二百七十七兩二錢一釐又補銷光緒八年運送軍火車價實銀三十一兩六錢統共各款請銷實銀三萬六千三百八十八兩八錢一釐內例銷車價照例核給全銀其船價繆夫口糧廩給口糧馬乾棚廠遵照停票章程改給六成實銀房價一項各州縣均於官兵到站時向民間重價租賃較例定價銀多至數倍現均按照例價造報應請查照例銷車價一律核給實銀俾免賠累並請俟奉部

准銷後在於兵差經費項下分別核明撥給歸墊未奉准銷以前
不准先行列入交代作抵以免虛懸而昭核實其應飭查各起差
務俟查覆到日歸於下屆報銷案內核辦等情具詳前來除飭將
各項報銷總冊清冊詳咨戶兵工部查照外理合恭摺具陳伏乞
皇上聖鑒敕部核銷謹
奏

林維源捐賑請獎摺 光緒十九年十一月二十四日

奏爲大員疊捐賑款爲數甚鉅籲懇

天恩俯准援案給獎恭摺仰祈

聖鑒事竊查本年二月閒山西邊外七廳因旱成災欽奉

諭旨飭臣協籌賑撫旋據二品頂戴辦理臺灣墾撫事宜太僕寺

卿林維源捐銀二萬三百兩六七月順直大水又捐銀二萬七千

六百兩先後解到兌收轉撥濟賑並據該京卿以受

恩深重情殷報效不敢仰邀獎敘等情由籌賑局司道詳請核

奏前來臣查林維源前因屢次捐助軍需鉅款仰邀

恩獎洵擢京卿每遇各省水旱偏災無不慷慨好施捐貲濟助卽

現辦臺灣墾撫事宜常年需用經費不下數萬兩亦皆自行捐辦

公忠體

奏稿七十七

呈

國海內所稀本年晉直兩省猝被重災需款孔亟正值連年勸捐
物力疲敝之餘累寸積銖尙難籌集該京卿兩次捐銀四萬七千
九百兩全活災黎無算實屬志切救民功能濟眾有裨大局匪淺
雖據聲稱不敢邀獎而捐數較鉅未便壅於

上聞該京卿係現任三品大員階銜均無可加自應照例准其移
獎查光緒十六年順直水災浙江烏程縣廩貢生候選郎中龐元
濟捐賑銀三萬兩十八年江甯等處旱災廣東南海縣貢監生周
長華捐賑銀三萬兩經臣及兩江督臣先後奏蒙

特旨賞給舉人准其一體會試欽遵有案今林維源之子候選知
府監生林爾嘉讀書敦品有志上進可否仰懇

天恩俯准援照龐元濟周長華成案

賞給舉人准其一體會試以昭激勸出自

特恩臣亦知科第爲士子進身之階本不應破格陳請特以林維源獨捐賑銀至四萬七千餘兩之多好義樂輸實非尋常所有且捐數較龐元濟等尤鉅若蒙

恩准所請既足勵急公嚮上之忱亦無慮援引冒濫之弊是否有當理合恭摺陳請伏乞

皇上聖鑒訓示謹

奏

奏稿七十七

庚

長蘆欠款展限摺

光緒十九年十一月二十四日

奏為長蘆補欠積欠二款勢難補徵仍請照案推展五年以紓商力恭摺仰祈

聖鑒事竊查長蘆應徵補欠積欠二款係嘉慶道光以前參商欠項於道光二十八年清查案內議令現商按引攤交前因商累已深奏准自同治十三年起停徵五年嗣於光緒四年十年十四年三次奏准推展各五年在案扣至十九年十二月限滿據鹽運使季邦楨詳稱現值時艱帑絀多籌一分進款即多濟一分之用此項補欠積欠但可設法啟徵斷不任藉詞請緩惟自道光二十八年增定科則以後又加徵復價加價等款核計每引交款過多商力已形竭蹶加以直晉災賑疊捐巨款及公捐報效京餉又不下數十萬金更屬筋疲力盡且直隸引岸疊遭災歉鄭州決口之後

奏稿七十七

呈

民氣未復而順直各屬連年大水銷數日形壅滯本年北河決口水道淺阻京商引鹽多未抵岸落廠陸運所費彌多商情極窘若再將遠年參商舊欠責令代還其力萬難支拄必致有礙現課據通綱商人瀝情籲請推展該司詳加體察不得不從緩議徵請照案自光緒二十年起展限五年俟限滿再行察酌核辦等情具詳前來臣查現課本較舊欠緊要必先顧現課庶無誤京協各餉近年災歉頻仍眾商於運銷艱絀之時仍竭誠疊捐巨款應完正雜引課近數屆又係照額全完實屬勉力輸將勢難責令再還舊欠應懇

天恩准如所請辦理藉恤商艱所有長蘆補欠積欠二款仍難補徵請照案再展五年緣由理合恭摺具陳伏乞

皇上聖鑒訓示謹

奏

奏稿七十七

吳

兩知府請付史館摺 光緒十九年十一月二十五日

奏爲已故知府政績卓著遺愛在民籲懇
天恩宣付史館恭摺仰祈

聖鑒事據天津縣在籍紳士前湖南興甯縣知縣劉錫九等聯名
呈稱已故天津府知府鄒振岳於光緒十五年由宣化調任天津
地處衝繁竭力整頓清釐積案政聲卓然郡中錢賈巧僞百出認
眞釐剔積弊一清商民稱便津沽地勢窪下頻年患水辦理賑務
親歷查勘核實散放全濟尤多兼辦守望各局嚴拏積匪地方綏
靜平時聽斷明決如理家事纖悉無遺循行各縣講求政教吏畏
民懷十八年夏開南運河水勢盛漲衝冒風雨竭力搶護東隄賴
以保全本年查辦子牙河工甫旋又以南運河驟漲馳往搶辦奔
走烈日中感受暑邪因病出缺聞者均爲感泣又據宣化縣在籍

奏稿十七

兕

紳士五品職銜閻文瑞等聯名呈稱已故宣化府知府章洪鈞光
緒十二年到任邊郡文風樸儉藏書最少該故守捐廉購辦經史
及關係掌故政治等書二千餘卷置書院中暇日與諸生講解討
論宜人始知嚮學庸關溝路爲南北衝途蒙部之朝貢臺站之
轉運俄商之販茶皆取道於此往來苦其嶮巇該故守稟定商捐
章程分別等則遞年興作一律坦平商旅頌德縣屬之蛇腰嶺地
當要隘夏秋洋河泛溢輿騎艱行該故守勸捐集款別治道三段
以避危險百八十日而工成行者稱便屬縣義倉年久滋弊分飭
牧令撤換紳董示以豐歉糴糶之宜認真舉辦親往抽查倉儲充
實荒歉有備至今利之聽斷不尙威刑遇有案關風化倫紀必諄
諄導諭咸知感服訟獄衰息平時勸諭士民尤以禮教廉恥爲先
從前演會冶游之風因之中止習俗一變其他如罷各署之私徭

減行縣之供頓清查奸宄整頓郵政凡有益於地方之事無不舉行前後所頒條教居民皆能傳誦聞其卒也巷哭野祭遠近相屬先後由各官紳臚敘事蹟詳請奏乞

恩施宣付史館等情前來臣查鄒振岳於同治四年由庶吉士散館改官直隸八年經前督臣曾國藩甫莅畿疆首以整飭吏治為務舉劾屬吏最為精嚴所舉各員其後或遷擢他處或中道凋謝獨鄒振岳由牧令歷官郡守在直隸三十餘年歷時最久所至有聲尤善治盜於饒陽嚴辦砍刀會於清苑拏積匪套白狼及劉德沛悍黨於易州拏辦大猾趙老尙等案並赫然在人耳目在津四年治水辦災殫竭心力竟以炎暑防河政疾不起尤為津人之所哀思章洪鈞於光緒七年由編修經臣奏調來直深知其操履清嚴志趣遠大言論規畫皆平實可行臣曾再疏保薦蒙

奏稿七十七

平

恩簡放宣化府知府抵任後察其治行真能力踐其言不為赫赫之名而所設施皆卓然有古儒吏風軼身歿之日士民感念至今不衰代章洪鈞者即鄒振岳宣人追述循績必以二守並稱謂章洪鈞以德化而鄒振岳以才顯相繼為政邊郡數十年所罕見也伏讀同治三年

上諭祁雋藻奏弭盜安民必資循吏請分別表彰一摺嗣後各省大吏務宜加意訪查其有政績官聲遺澤在人者奏明宣付史館編入循吏列傳等因欽此光緒五年原任臺北府知府林達泉廬州府知府李炳濤七年原任揚州府知府何金壽疊經前兩江督臣沈葆楨左宗棠奏請

宣付史館立傳奉

旨允行鄒振岳章洪鈞居官政聲與林達泉等相埒而畿輔列郡

尤爲政教之先自應舉其尤異者加之表揚以示風勵今據該紳士等臚陳籲請足見遺愛未泯公論允孚合無仰懇天恩俯准將已故知府鄒振岳章洪鈞生平事蹟宣付國史館列入循吏傳以彰治行而順輿情除將該員等事實冊結分咨外理合恭摺具陳伏乞

皇上聖鑒訓示謹

奏

宋永譽補祀昭忠祠片

光緒十九年十一月二十五日

再永年縣故宦宋永譽前明崇禎壬午科舉人

國朝定鼎入都謁選授陝西郿縣知縣在任遇難罵賊不屈死
追贈陝西按察司僉事廕一子入監讀書廕恩騎尉世職載在邑
志查該縣舉人李蔚然於同治二年任定番州知州遇賊殉難得
旨賞給恩騎尉世職入祀本籍昭忠祠宋永譽與李蔚然守土捐
軀事蹟相同李蔚然已於同治十二年入祠附祀宋永譽尙屬缺
典該縣紳耆請援李蔚然之例在於本籍昭忠祠設位致祭呈由
府道轉咨藩司具詳前來臣查各直省昭忠祠建於雍正二年用
祀立功致命諸臣宋永譽服官授命之時在未建昭忠祠以前是
以未列祀典現經查明事蹟與入祀之例相符合無仰懇
天恩俯准將宋永譽附祀本籍昭忠祠以慰忠魂理合附片具陳

奏稿七十七

至

伏乞

聖鑒訓示謹

奏

察哈爾牛捐請獎摺

光緒十九年十二月十二日

奏為察哈爾內外各旗羣滿蒙官員兵民捐助耕牛援照歷屆成案酌請獎敘繕單恭摺仰祈

聖鑒事竊照張家口內外地方因上年秋閒嚴霜早降禾苗枯萎顆粒無收被災村莊二百餘處民閒牛馬宰賣殆盡必須設法籌備以資耕作據口北道吉順以察哈爾所屬滿蒙官民牧養蕃盛尚可捐助牛隻會商察哈爾都統及旗羣官員均各樂從派員設局勸辦分撥應用援照成案每牛一隻核合實銀十四兩請俟事竣從優給獎經臣於光緒十九年二月初二日附片陳奏奉

硃批著照所請該衙門知道欽此茲據該道吉順查明察哈爾內外各旗羣滿蒙官員兵民一百九十一員名共捐牛三千八百九十九隻已飭委員隨收隨解撥發災區分給有地無力貧農領用

奏稿七十七

五

正值冬麥布種之際得此濟助獲益匪淺造具各該捐生銜名清冊請援案奏獎等情前來臣查光緒四年直隸河閒等府旱災察哈爾各旗羣捐助耕牛經臣奏請援照蒙古節次報捐駝馬成案核給獎敘仰蒙

恩旨允准部議謂其凡與成案相符或比照成案不甚懸殊者均准一律給獎誠以該處旗羣蒙古向隸外藩近年情形苦累而能慨分畜產惠及農氓故獎勵特從優異此次捐助耕牛至三千八百九十九隻之多實屬好義急公於救荒要政深有裨益既非內地勸捐可比亦與別項捐輸不同自應各按捐數援照節次奉准成案從優核獎謹繕清單恭呈

御覽仰懇

天恩俯准照擬給獎以昭激勸理合恭摺具陳伏乞

奏
皇
上
聖
鑒
訓
示
謹

奏稿七十七

五十四



機器局報銷摺

光緒十九年十二月十二日

奏為天津機器局光緒十七年分動用經費照章造冊報銷恭摺仰祈

聖鑒事竊照天津機器局經費奏明動撥津海東海兩關四成洋稅截至光緒十六年止業將收支款目造冊奏報經部核復准銷並將十七年支給薪工等款分別咨部立案茲據該局前福建藩司張夢元等將十七年分應行造銷各冊分晰開報計上屆存銀十一萬六千九百二十三兩有奇本屆十二箇月共收四成洋稅招商局船稅並江海關洋藥釐金海防支應局解到添造栗藥鋼彈經費津海關解到添購栗藥機器經費及各省撥還軍火等價銀四十二萬一千五百七十二兩有奇共支銷銀三十一萬六千四百十九兩有奇應存銀二十二萬二千七十六兩有奇業經定

奏稿七十七

五

購外洋器料並添建工程應歸付清價腳及工竣之年報銷所有本屆應銷各款仍照向章各歸各冊計全案收支總數及員弁司事工匠夫役人等薪工為第一冊購辦物料續建工程及核付保險運腳等項為第二冊收支物料分項造報用存物料作為光緒十八年分舊管為第三冊製成軍火撥發各項為第四冊撥給各船薪糧物料及行營製造局用料為第五冊神機營撥用物料為第六冊安設

頤和園電燈並運解海軍衙門各項物料腳價等項為第七冊其製造軍火仍造冊咨送總理各國事務衙門備查至製造各項器械皆仿西洋新式所用工料難以例價相繩循照歷屆章程實用實銷詳請具奏前來臣復加確核委係核實動用並無絲毫浮冒北洋籌辦海防拱衛

畿輔各營需用軍火爲費不貲加以創立海軍凡鐵艦快船魚雷艇水雷營及各口礮臺應需軍火名目甚多關繫尤重該局爲水陸各軍取給之源各項火藥子彈等件既須供支常年操防之用尤須豫備意外不虞之需該局員等均能覈實認真督飭工匠加緊製造惟應領額款僅指津東海關四成洋稅及海軍衙門撥給滬關洋藥釐金款少用多時虞竭蹶現又添造西洋新式長礮鋼彈新式栗色火藥雖海軍章程內奏明應月撥銀八萬兩無如各省關解不足額未能如數勻撥惟有督飭局員就款撙節動用勉力支持冀免貽誤除將清冊分送總理衙門暨戶兵工三部查照外所有天津機器局光緒十七年動用經費造冊報銷緣由理合恭摺具陳伏乞

皇上聖鑒謹

奏

奏保朱靖旬等片

光緒十九年十二月十八日

再治事首在得人選才必先歷試臣久膺疆寄留意人才每遇屬僚材器可用者詳加考察既有所見自應隨時論薦以備

聖明采擇查有候補道保定府知府朱靖旬勤求民事練達老成在任已歷十年疊經薦舉卓異保定發審局爲通省訟獄總會之地該員綜司局務事必躬親遇有疑難大案盡心推讞多所平反吏才精敏一時稱最候選道劉啟彤前由總理各國事務衙門奏派出洋游歷回華後將所著英法印度政事鐵路各冊進呈御覽并以該員采訪精詳有裨時務保奏奉

旨發交臣處差遣委用該員明體達用樸健耐勞於洋務吏治均能認真研究上年晉邊大旱經臣奏派前往辦賑周歷荒山窮谷全活甚多並代籌善後積穀之資晉中官民交口感頌道員用候

奏稿七十七

五

補知府獨石口同知潘青照疊署延慶蔚州懷來萬全張家口各廳州縣凡所設施皆思慮精到可垂久遠士民樂其條教嚴密而不涉煩苛去歲北口內外旱荒該員多方救濟仁政所感咸願集資助賑活人無算輿頌翕然歷任道府皆稱其能實爲循良之選以上三員臣知之甚確不敢壅於

上聞合無籲懇

天恩俯准將該員朱靖旬等由臣咨送吏部帶領引

見應如何錄用之處出自逾格

慈施臣爲人才難得起見是否有當理合附片陳請伏乞

聖鑒訓示謹

奏

奏撥搶修近省隄河經費摺

光緒十九年十二月十八日

奏爲照案湊撥來年附近省城河隄歲搶修經費恭摺仰祈
聖鑒事竊附近省城河隄歲搶修經費每年需銀三千兩奏明於
清河道庫積存河淤地租並堡船祿夫生息項下撥發嗣因存款
不敷復經奏准由藩庫旗租項下湊撥茲據藩司裕長清河道潘
駿德詳稱光緒二十年前項歲搶修經費道庫仍不敷動撥但工
程緊要關繫民生休戚勢難停辦應由藩庫旗租項下照案湊撥
銀二千五百兩以濟要需除批飭照辦外理合繕摺具

奏伏乞

皇上聖鑒敕部查照謹

奏

永定河籌辦拋軛法片

光緒十九年十二月十八日

再永定河近年大汛盛漲險工林立防不勝防漫決頻仍勞費不可勝計前飭該河道萬培因察勘拋軛護隄護埽之法茲據該道會同臬司周復候補道張蓮芬勘議擬先於永定河上游河面較寬之石景山盧溝司南上北上北中北下等六汛先行試辦俟有成效下游各汛次第舉行經臣批准仿照東明成案辦法每年由練餉局籌撥銀二萬兩歸入月案報銷所需大軛已飭委員擇地趕速燒造以備臨汛拋用查軛壩係河工新法自原任東河督臣栗毓美創之於原陽繼用之於黃沁上南祥河曹河各廳無不應手奏效直境東明上汛中汛河工自光緒十六年起添拋軛壩河流亦漸順軌永定河水性與黃河無異如拋護得力此後當永遠照行庶已拋者益臻穩固未拋者陸續增多埽段可漸減少練餉

奏稿七十七

吳

局雖甚支絀不得不移緩就急督飭通融籌給以濟要需理合附片具陳伏乞

聖鑒敕部立案謹

奏

